

東  
華  
續  
錄

東華續錄

光緒一百二

臣朱壽朋敬編

臣沈彭年恭校

二月丁酉祭 先師孔子廟遺恩承行禮○戊戌祭 社 稷壇 上親詣行禮○唐炯奏據礦務公司稟稱本年自五月至七月晝夜大雨七月以後又復瘟疫大作各廠不能施工而所募砂丁五六千人慮散役後一時招募難集仍須留養廠中加以改鑄銅磚賠累折耗以是數月來公司虧墊甚鉅幸賴借發銀十萬兩始將九起二批十起頭批京銅趕辦齊備現在滬渝各埠股本難招商號又因前欠未清不肯再借而各廠日有起色需用甚繁無從籌措誠恐功虧一簣有誤京運大局懇請借發銀三十萬兩作為公司辦銅底本分十年扣收以竟前功而維京運等情前來臣查所稟各情委係實在當公司開辦之初一切尙無端倪自未便以公帑輕擲嘗試又集股正形踴躍商力頗克自支更無容公家接濟惟迄今將及三年費本至七十餘萬幸而各廠已有成效正冀從此日見盈盈乃當喫緊之時商力已竭若不亟為接濟深虞半途而廢既非體恤商情更恐貽誤京運此後無人復敢承辦臣權衡輕重不能不允其所請借撥銀三十萬兩飭司自十七年起按批扣收二萬公司得此鉅款接濟自顧成本不能不竭力籌辦俾

京運逐年加增自亦不待十年即可扣收清楚似於京運商情兩有裨益至前借十五萬兩臣於十起頭批已扣回四萬兩合併聲明下戶部知之○明勦奏查奴才衙門接奉管理綺華館事務福焜札開現奉諭旨在西苑門內設立綺華館製造綢緞著派杭州織造購辦搖紡煉染五成上好之各經緯絲共一千斤招募精通繅絲煉染紡織各匠並養蠶婦以及購買織綢各項機張器具一併招募製辦航海解京並行令將應用欸項著該織造詳細核即時聲覆各等因奴才到任後採辦絲斤招募匠人製備機張均綺華館應用要需自當遵辦惟查絲斤一項需欸甚鉅擬請飭下戶部指撥欸項以資辦理俾可迅速解京所有招募各匠現當冬令海道冰凍北上不易應俟明春再行解送至能否如數招募容奴才察看情形隨時酌量分別辦理下戶部議奏○庚子升泰奏奴才前於光緒十四年秋間奉旨赴邊會經奏明請由部撥發銀七八萬兩以資辦理旋奉諭旨允准在案維時奴才初意以為邊事不久即可告竣詎印兵雖退而英官任意遷延事機屢變隨帶官兵不能遽撤延至十六年五月始得辦結旋藏又兼遠赴印洋立約並押費用繁多凡此意外之需皆非初料所及曾經電請總理各國事務衙門聲明前欸告匿由印先後兌撥銀四萬兩亦在案惟是此次辦理邊務當赴邊之時正值藏地邊亂百務棘手所用騎獸係屬僱覓到邊後值兵燹之餘百物價昂各兵按月發給加餉尙覺不敷用度駐邊一日即有一

日之用住日斷難停支且日用之需以及騎獸腳價均付給外番不能議減未便扣收減平統計在邊在  
洋先後二十餘月計由部籌撥七萬兩由印匯兌四萬兩復在藏庫提用過一萬兩共收到銀一十二萬  
兩所有漢番官兵月餉騎獸腳價以及在洋與英官會晤議辦事件往來藏洋費需一切因公動用共支  
過銀十二萬七千一百八十四兩九錢七分現據支發委員理藩院司員署隨印司員裕綱將先後用過  
銀兩造具清冊呈請核明咨部請銷前來奴才覆覈無異合無仰懇 天恩俯念事屬創辦且係遠赴窮  
邊兼出印洋情形與歷辦夷案不同實難與向來藏地成案例支章程符合懇請 飭下戶部查照分別  
核銷得 旨如所請行○辛丑諭軍機大臣等有人奏河南溫縣知縣李普潤徵收糧價過令鋪商承買  
官銀索費數千兩凡詞訟案件縱容書差丁役索賄擅權前在唐縣任內伊兄坐堂徵比錢糧尤屬荒謬  
等語所奏如果屬實亟應從嚴參辦著裕寬按照原參各節確切查明據實具奏毋稍徇隱原摺著鈔給  
與閱看將此諭令知之○癸卯張曜奏准戶部咨議覆御史恩壽奏南省災區太廣請飭辦鹽斤加價一  
摺應由各該兼管鹽務督撫轉飭運司體察情形妥議奏明辦理光緒十五年十二月十一日具奏奉  
旨依議欽此欽遵咨行到臣當經轉飭遵辦去後旋據鹽商聯名具稟以山東頻年水患鹽務滯銷引積  
課懸商民交困若再於定價之外每斤加制錢二文恐民間貧賤食私銷數更形減少少領一分引張即

少完一分課款未得加價助賑之益先有賠虧正供之虞請仍照舊辦理免其加價以恤商民等情臣詳加體察雖係實在情形但當此各省偏災屢告山東黃水爲害尤其連年工賑兼籌庫款入不敷出苟有可與之利可籌之款自當力爲其難復經批飭運司悉心妥議毋任畏難推諉茲據該司鹽紳泰詳稱山東鹽斤曾於道光年間節次加價至道光二十九年 欽差查辦案內奏請酌量裁減以便民食咸鹽五年河決銅瓦廂黃水改道來東沿河數十州縣無歲不災迄今未已閭閻生業凋零銷鹽不暢商人因之困乏體查現在情形自未便再行加價惟查鹽包例重三百二十斤場地產鹽近因海潮爲黃水所奪率多粒大中空內含鹵水各商舂運近則數百里遠則一二千里不等沿途雨淋風耗傷損極多該司於無可籌畫之中擬請每引票千張加增津貼銀二百兩准其每包加鹵耗鹽一百二十斤定以四百四十斤爲一包以期裕庫恤商兩相兼顧所加津貼按每年領引二十六萬七萬道領票十四五萬張計之約可徵銀七八萬兩查每年奉撥京餉二十一萬兩徵收各項課款祇十八萬兩上下應請將此次加增津貼先儘貼解京餉餉需解足餘剩若干用備本省賑需詳請具奏前來臣查該司所請既與國課有裨亦與商民無損自應准其照辦下戶部知之○西安將軍尙宗瑞以癘免○丙午朝 日於東郊○駐藏幫辦大臣紹誠卒於山西途次 賜卹如副都統例○諭奎煥著賞給副都統銜作爲駐藏幫辦大臣照例馳

驛前往○丁未李經方奏中國與日本通商口岸橫濱神戶長崎設正理事官外嗣因箱館新潟廣港商務漸興添設副理事官一員此外築地一處歸橫濱理事兼轄大坂一處歸神戶理事兼轄近年大坂商務日盛交涉漸多而築地坐落東京華民寄寓益眾現擬請築地大坂二處仍歸橫濱神戶理事官兼轄惟再設副領事各一員於隨員中擇其廉幹有爲者分別派充以資助理得 旨如所請行○張之洞譚繼洵奏光緒十六年九月二十七日 臣等承准軍機大臣字寄光緒十六年九月十六日奉 上諭有人奏湖北安陸府屬獅子口地方抽收船釐等因欽此遵 旨發信前來 臣等遵即查照鈔奏各節密委湖北卽用知縣趙五星馳往密查稟覆隨飭湖北布政使牙釐總局會同體察情形核議詳辦茲據該司局覆查咸豐初年安陸府屬獅子口潰決襄河橫流直由潰口衝入民田至下游始繞歸大河正流淤斷船行不歸故道其間或過木椿石碑及房屋墳墓撞壞者甚多舟楫阻滯沿河貿易日衰商民苦之八年前署府陳壽圖倡議請於該府往來船隻量抽船釐修復鐵堤尙未舉辦九年始據前署府邢高魁稟明設卡抽釐築堤添建石磯堵塞潰口河歸故道商船通行民田亦多潤復商民均以爲便因將抽收船釐章程於四工岸上刻石以垂久遠此船釐創辦之始邢高魁爲湖北著名循吏安陸士民至今稱頌不忘追同治元年船釐提充軍餉鐵堤歲修循照從前章程按畝派費興修光緒九年因給事中黃元善奏按畝

收價百弊叢生奉 旨查辦十年經前督撫臣查明奏請將船盤撥歸鍾堤歲修專款裁汰款費以紓民  
力是此項船盤關係堤防要工既免派捐款實無不至動撥庫款似不得如原奏所云無補正款且每年  
約可收錢一萬數千串亦非如原奏所稱所收無幾也現據委員查覆鈔呈原刊碑記初辦抽收章程船  
隻有大中小之分小船收錢自一百文起中等船以次遞加一串二串有零不等大船至三千四百文而  
止原奏所云其始每船極多不過數百文出自傳說委非事實至所稱近年逐漸加增非錢數千不能完  
盤一節查船盤開辦適值兵燹之後長江梗塞船隻稀少故碑記所載船名僅四十一種至光緒十一年  
船盤局冊報船名增至六十種茲委員趙五星開呈手摺又多出船名四種船屬後增式樣日新丈尺愈  
放收數自漸加多十年來即係照現在章程辦理然收捐溢於三千四百文外者亦只滿江紅五船編大  
號平頭鐵三項原奏所云非錢數千不能完盤者乃指極大之船而言也又原奏所稱繳足後並不給票  
往往留難數日不肯放行一節據委員查覆沿途諮訪各船戶並密查該處所報船隻均係隨到隨報收  
捐後即行給票或停或開均聽各船自便尚未見有留難苛索之弊惟船盤局設在河東若遇夏秋盛漲  
河流近西岸之時船戶過河完盤不免停待時刻殊多未便等語竊查鍾堤歲修專恃此項船盤全堤互  
長九十里爲鍾祥及下游七州縣民命田廬保障每逢迎溜頂衝各段危險萬狀臨時既須搶護平日尤

賴培修近因經費不敷該州縣等時求借撥上年鐘堤潰口經前督撫臣奏明借撥官款修復分年攤還現正據該府縣懇限期攤徵而徵費久經奏明裁汰各庫均皆支絀實無另款可籌且堤完卽以利船行船戶相安已久自未便輕議撤免惟收捐章程歷來未能盡一自應擬定章程則揭示局門刊立碑記俾免司事巡丁等藉端苛擾茲將各船收捐之數分別等差一體量爲核減大率多者減去三四成少者減去二成仍令小船收錢自一百文起大船收至三千四百文而止至多不得過原刊碑記之數以紓商力仍照初辦章程商貨滿裝全抽半裝折半空船概不抽取並飭令該局視水勢或迎東岸或近西岸隨時移設驗船杆手併歸一處不得分而爲二以免耽延而示體恤至堤工用款本年八月間業經臣等嚴定章程由該撫督率鍾祥縣核實勘估動支力求撙節立有印簿府縣局員互相稽核通盤籌計以節省之項抵減收之數若商船暢旺流通每年鐘堤經費尙可敷用以上各節由布政使黃彭年牙釐局司道等會同詳請覆奏前來臣等查襄河連年盛漲屢有潰決沿河州縣民力困苦上年奏借修復潰口分年攤還之款該府縣尙請展限攤徵斷無復抽徵之理而鐘堤爲鍾祥及下游各屬民命所關此項船釐早經奏歸歲修專款抽收已久商民相安既無另款可籌自難輕議撤免現據委員查復該司局將各船抽捐數目一體酌減經臣等覆加核定刊示定章嚴禁苛擾似此則商力既紓堤工要款亦可不至無著擬



即檄飭勒石與原刊碑記一同樹立以重要工而杜索擾報聞○科布多參贊大臣雙壽卒以魁福爲科布多參贊大臣○己酉長順奏吉林地方山深林密土廣人稀自昔年馬賊肆擾後至今伏莽未靖時有結夥成羣之賊出擾閭閻近則頻年災歉流民愈多盜風復熾大率以深山爲巢穴每至樹葉盛密出禾深茂往往山賊勾結土匪乘間竄擾所用器械多係新式後膛快鎗並用洋鎗馬礮列陣抗拒官兵而我兵所持洋鎗均是早年置買轉不敵其快利該賊等一經敗逃則又竄入荒山叢林密箐徑路分歧捕之無從捕擊之無從擊有時官兵購覓眼線嚮導裹糧入山直搗賊巢而山內頭頭是道該賊又消息靈通先行竄匿他處兵出則逃兵歸則復賊之狡獪捕之艱難大概如是迭經奴才嚴飭旗民各署並督同翼長統領飭帶各路駐紮練軍同心戮力協剿窮搜而將弁兵勇等每遇賊夥聚衆對敵打仗之際縱時有傷亡仍能奮不顧身勇往直前陸續平燬賊巢歷次陣斬首級奪獲賊械鎗礮馬匹刀矛旗幟實與戰功無異奴才每於年終彙奏正法盜匪摺內聲明另行請獎在案計自光緒十三年六月起截止光緒十六年六月底止除打仗殲斃賊匪不計外共生擒首從各盜一千三百有餘均經審實正法茲據各副都統並翼長委員等核明文武員弁以及地方官節制之捕盜營所有在事出力人員開單請獎前來奴才詳加查核尙無冒濫謹擇其尤爲出力文職四十六員名武職一百五十八員名分別繕繕清單恭呈 御

覽合無仰懇 天恩准予照章獎敘以示勸勉而勵將來出自 鴻施迎格此外出力較次員弁兵勇由

奴才酌給五六七品功牌及千把外委等官分別咨部辦理其歷次陣亡官弁兵勇共三十五員名另請

恩卹下部議奏○庚戌王文韶譚鈞培奏前因雲南巧家屬屬蠻匪滋事擾害披猖當將派兵剿辦緣

由於十月十四日附片奏報在案嗣於十月十五十一月初十五等日據署東川府知府易爲霖巧家

屬同知王德中管帶省防戰兵參將王天長管帶江防戰兵副將顏雲芳等先後稟報九月二十六日王

天長督率哨弁馬朝東等進攻紅腳梁子顏雲芳督隊進攻跑馬坪子蠻酋祿汶仁祿家福等糾集羣蠻

分投迎拒連日鏖戰陣斃蠻匪百餘人當將紅腳梁子跑馬坪子一律燒燬查點我軍亦有傷亡十月初

五六七等日王天長進規老君山大中梁子一路顏雲芳進規杉木箐中梁子一路該匪等均堅壁拒守

仍分投埋伏深林密箐中以爲聲援我軍探悉情形戒備前進伏不敢發乘勢攀崖而上同時將老君山

杉木箐等處一律攻克匪勢不支退踞泥落漢家子脚一帶我軍合而爲一勇氣百倍卽於十一十二等

日將該處賊巢礮卡一體剽平祿汶仁等率衆狂奔遁入川界復於十月十九十一月初一等日迭次句

結川蠻大股每於黑夜出巢猛撲官軍營壘王天長顏雲芳等督飭所部兵勇衝鋒接戰鎗礮齊施擊斃

蠻匪七十餘人砍獲驢馬頭目首級六顆剝取皮甲多件奪獲鎗械無數祿家福身帶鎗傷仍竄四川蠻

境內附從家娃紛紛逃散易爲霖王德中親率兵圍沿山搜捕迭有新賊旋據被擒各支夷頭目萌記老  
二祿使挪阿巫奪奪秋狄夫一等三百六十戶前赴軍前投遞甘結誓不敢再有反側並獻出歷年被擄  
川滇難民王芳順姚興順等男女一百一十三丁口均經訊明結實發給路票資遣回籍肅屬蠻境一律  
肅清等情會同稟請奏報前來臣查雲南東川昭通兩府處處與四川接壤以金沙江爲界割獨披沙一  
隅孤懸江外實爲兩屬之地漢夷錯處控制較難此次衅起滇蠻而川夷咫尺不旬自通用兵殊多牽掣  
方起事之始先經昭通鎮總兵何雄輝立飭江防副將顏雲芳尅期帶兵前往臣等聞報後復派省防參  
將王天長馳往剿辦並飭該管府屬易爲霖王德中親赴軍營籌商剿撫機宜尙幸文武和衷將士効命  
用能早日竣事不致蔓延旬結釀成邊患現在蠻酋祿汶仁竄匿川屬夷疆祿家崔傳聞受傷身死尙無  
確耗臣已飛咨四川督臣劉秉璋嚴飭該管土司將該蠻酋縛送滇營以伸國法仍留王天長顏雲芳  
兩軍分紮川滇交界隘口以資鎮懾而定人心所有陣亡之都司銜儘先補用守備戴成把總韓信和應  
懇天恩勅部從優議卹兵勇團丁查明照例卹賞其在事出力人員不無微勞並懇恩准擇尤酌保  
用示鼓勵得旨知道了仍著嚴拿祿汶仁等務獲懲辦陣亡之戴成等著交部從優議卹出力人員准  
其擇尤酌保毋許冒濫○辛亥諭所有京察一等交軍機處記名各員著自本月二十二日起按照名次

先後每日二員呈遞膳牌於寅刻伺候召見如是日未經召見仍於次日預備遇有出宮行禮拈香等日  
期應行預備召見之員毋庸呈遞膳牌仍於次日預備其餘各員以次遞推其記名之內務府郎中文琳  
等三十二員著俟各部院衙門人員召見完竣後於次日起接續伺候召見○馬玉瑤奏廣西地極南徼  
土漢雜居自秦漢以來達人傑士垂勳布惠者代不乏人而千百年後村野之丁男婦孺土廟之椎髻  
犛獠無不感慕思贖代如新爭出其纖篲力作之資私為創造祠廟書院則惟漢臣伏波將軍馬援明  
臣兩廣總督王守仁為最著臣校閱所經南甯府城及所屬多有馬援王守仁祠廟而橫州之烏蠻灘馬  
伏波廟尤著邕甯水旱愚難祈禱輒應思恩府城士民所建陽明書院祀王守仁今猶重加修葺講學其  
中至馬援廟祀各府所在尤夥士人拜舞崇奉不絕臣嘗讀漢史馬援征交趾討徵側定六十餘城所過  
輒為郡縣治城郭穿渠灌漑以利民又明史稱王守仁總督兩廣破斷藤峽八寨降土酋盧蘇王受撫其  
衆七萬宗傳以致良知為本弟子滿天下至今粵民猶追思樂道兩人之遺事於弗衰竊維教養之澤  
深入人心故報祀之隆永於身後馬援王守仁均與有功德於民則祀之例相符查王守仁附祀文廟  
久銜恩褒祀典已極隆重無可再加然俎豆雖公百代之馨香而脾胃雖已一方之私祝似並行而不  
悖因教勸而易從與馬援均足以獎起頑懦合無仰懇 天恩俯准頒賜 御書匾額兩方交臣敬謹懸

桂橫州烏蠻灘馬援祠廟及思恩王守仁書院凡廣西所屬各府州縣前已建有馬援王守仁祠廟書院之處飭令地方官春秋專祭以順輿情而宏治化出自邇格 鴻施得 旨如所請行○馬玉瑞奏已故大學士陳宏謀平生篤守程朱之學而能踐履見諸行事歷官所至以正俗育才爲己任尤盡心水利實惠經久嘗刊近思錄大學衍義又輯九種遺規風行於世化洽於鄉其臨桂原籍士習民風至今能敦本向學實由陳宏謀有以倡之其治績品望昭昭在人耳目久蒙 恩旨入祀賢良祠 褒榮優渥豈敢再爲演請惟我 聖朝養士之隆得人遠超前代其挺生嶺表爲閩省儒賢冠冕洵足輝映山川查近日名臣多蒙 恩命建立專祠陳宏謀功德在民身教成俗愈久而民愈不能忘合無仰懇 天恩可否將已故大學士陳宏謀准予建立專祠由該子孫籌資自建令地方官春秋致祭以示 褒異爲廣西人士端其趨向樹立風聲實出 隆施逾格得 旨如所請行○壬子劉銘傳奏查臺灣辦理撫墾地日廣經費日繁不得不盤剝餉源藉資接濟前當清賦之時內山新闢田園隨時報墾升科其高山巨嶺地利宜茶第土薄力微民人種報無定因就茶收墾款量抽撫墾經費包商繳收光緒十三年試辦之初收數未暢十五六兩年每年約可收銀六七萬兩均隨時撥充辦理撫墾之需除按年截清數目彙入督後案內列款造報外據督後稅釐兩局司道詳請奏咨前來除咨部外理合具陳下戶部知之○丙辰貴陝甘總

督譚鍾麟在紫禁城內騎馬○丁巳王文韶譚鈞培奏請省自經兵燹地廣人稀毘連川界各屬貿易開  
盤半雜川民引類呼朋喧客奪主歷經嚴飭地方官妥爲彈壓認真稽查在案正月十二日申刻忽據離  
省九十里之富民縣紳士張紹謙等飛報到省據稱該縣知縣端木鴻鈞奉臬司委赴離富民一百二十  
里之祿勸縣會審謀財害命檢驗骨殖一案於初八日起程前往縣城空虛突有四川會理州人黃二布  
客卽黃子榮及其兄黃子富弟黃子華爲首僞稱大帥主二帥主三帥主糾約川滇兩籍無賴約三四百  
人於十二日寅刻攔入富民縣城先搶縣署倉庫劫放罪囚殺斃署中親屬家丁十一人汛官陳天壽率  
兵巷戰力竭捐軀署典史馬乾效死勿去罵賊被戕兩學教官乘間出城赴鄉齊團該紳等得悉亂耗稟  
請發兵剿辦前來臣等聞報不勝駭異當卽札委營帶綏靖中營副將張紹模管帶綏靖右營總兵楊發  
貴各率所部立刻拔營星馳出省一面飭該管道松林密諭張紹謙等趕緊集團約以卽晚齊抵城下會  
合並以縣令出差汛官殉難兵團無人聯絡復派雲南府知府陳燦城守營參將張鳳鳴帶領親兵哨隊  
會同張紹模等飛速前往當於是日三鼓齊抵富民端木鴻鈞歸途聞警亦卽繞道馳回其時該教官等  
已率同紳團直逼城根官兵繼之立時奪門而入殺賊四十餘人生擒二十一名餘匪棄城奔逃此十二  
日一晝夜間土匪攔入富民縣城及兵團復城之實在情形也十三日陳燦城取賊供知賊首僞主帥黃

子榮黃子富等寄居武定州之羅家莊距富民八十里因商定陳燦張鳳鳴留辦城防張紹模楊發貴率隊跟蹤追賊十四日馳抵羅家莊探知黃子榮兄弟並未逃歸當將賊屋焚燬一面安撫居民卽有黃逆同鄉親家李三布客卽李憎與黃逆先期密約結聯黨羽僞構大帥意圖襲取武定州城互相聲援署知州花城署武定營參將潘永勝偵知賊情預爲戒備十四日丑刻果有匪徒二三百人乘夜直撲州城幸兵民聯爲一氣分投迎擊陣斬賊匪二三十名奪獲鎗械多件賊始敗退先是距州城十五里之祿勸縣於十二十三等日地方迭傳警報該縣城垣卑陋向未設有營汛部選知縣李世琛到任甫及一月教官馬佩琮以採辦祭器到省倉猝之間難爲守計當飭典史姚紹瓊赴鄉號召團練限十四日齊集縣城固守不料僞大帥李憎等卽於十三日夜間分遣匪黨攻撲州城自率悍賊竟於十四日卯刻突入縣城搶劫倉庫縱放獄囚李世琛知事不可爲衣冠端坐大堂罵賊被害情形至爲慘烈花城潘永勝聞信立派把總張其仁抽調營兵並撥團丁二百名馳往救援姚紹瓊招集鄉團同時趨至張紹模楊發貴於羅家莊探知祿勸有變亦亟覓間道馳援卽於是晚四鼓襲城而入殺賊數十人僞大帥李憎僞先鋒李輔臣僞軍師趙信五等率其餘衆奪路狂奔我軍跟追數里擊斬逆匪百餘名李輔臣趙信五亦斃於陣並將逆首僞大帥生擒解省此十四日一晝夜間土匪闖入祿勸縣城及兵團復城之實在情形也臣等查此

次變起倉猝其著名賊目大率皆四川會理州人而本地匪徒隨聲附和則以武定祿勸元謀等處爲多  
臣等自派兵收復富民後旋於十五日遽聞祿勸之變復經遴派記名總兵馬維驥招集舊部編爲綏靖  
選鋒營卽於次日成軍飭速取道安寧州黑鹽井繞出元謀之前以防賊匪偷渡金沙江竄入川界致成  
不了之局固不料數日之間卽已竣事也連日接據武定羅次縣先後稟報搜斬逆首僞三帥主王子華  
及黃子榮之子小黃三並生擒逆首僞大帥主黃子富解省研審黃子榮下落據供業已死於亂軍之中  
臣等未敢遽信仍嚴飭各屬上緊搜捕勿任漏網並檄委馬維驥周歷元謀武定祿勸羅次富民等屬會  
同地方官紳辦理清查整頓團練俾匪類無從匿跡庶地方藉可相安是役也三日之間兩城被擄匪徒  
喘息未定尙未及蹂躪地方卽經次第規復立就殲夷不特在事文武尙屬得力卽就地方紳團亦實深  
明大義奮勇可嘉自應仰祈 恩施用昭激勸謹另繕清單恭呈 御覽其餘在事出力之官弁紳團不  
無微勞足錄可否容臣等查明擇尤酌保等候 諭旨遵行其屬賊被戕之祿勸縣知縣李世琛署富民  
縣典史馬乾力戰捐軀之補用把總富民汛外委陳天壽應懇 天恩飭部分別從優議卹以慰忠魂陣  
亡之兵勇團丁俟查明另行核辦所有地方文武各官或會合兵團殲除醜類或先期奉委並不在城伏  
求逾格施 恩免予置議 上諭王文韶等奏土匪攔入縣城卽日派兵剿除一摺雲南富民縣城於本



年正月十二日該縣知縣端木鴻鈞前赴祿勸縣會審命案突被四川會理州匪徒黃二布客即黃子榮等僞稱帥主糾約川滇土匪攔入縣城戕官劫庫經三文韶等派委副將張紹謨總兵楊發貴及雲南府知府陳燦等先後帶兵馳往會同該縣紳團卽於是夜將富民縣城收復擒斬多名該逆黃子榮等又與李三布客卽李憎先期密約圍襲武定州城經該州兵民擊敗李憎率領悍黨竟於十四日突入祿勸縣城張紹謨等聞信馳援擊斬逆匪百餘名生擒首逆僞大帥李憎收復祿勸縣城逆首僞大帥主黃子華及黃子榮之子小黃三先後經武定州羅次縣兵勇搜斬並生擒逆首僞大帥主黃子富解省嚴訊此次變起倉卒在事文武於三日之間收復縣城首逆悉數殄擒地方未經蹂躪辦理尙爲迅速仍著王文韶等飭令各屬及派出員弁搜捕逆匪勿任漏網此股逆匪多係四川會匪著劉秉璋飭屬一體協拿務使川滇邊境一律肅清俾免紛擾爲患所有單開出力之副將張紹謨著交軍機處記名遇有總兵缺出請旨簡放總兵楊發貴著交軍機處記名遇有提督缺出請旨簡放補用游擊岳培高著免補游擊以參將留於雲南儘先補用並賞戴花翎補用守備馬福興著免補守備都司以游擊儘先補用把總張其仁著免補都司以游擊儘先補用並賞加參將銜補用守備嚴希濂楊朝佐唐占高均著免補守備以都司儘先補用嚴希濂楊朝佐並著賞戴花翎補用千總王映發著免補千總以守備儘先補用並賞加游擊銜

知縣嚴世銘著以本班仍留原省歸候補班前先補用並賞加同知銜訓導張紹謙杜喬林均著免選本班以知縣不論雙單月儘先選用張紹謙並賞加知州銜貢生蔡文義著以教諭不論雙單月遇缺儘先選用郭寶賢王兆祥均著以訓導不論雙單月儘先選用郭寶賢並賞加五品銜廩生楊樹盤著以府經歷不論雙單月儘先選用被戕之祿勸縣知縣李世琛署富民縣典史馬乾陣亡外委陳子濤均著交部從優議卹○王文韶等奏臣等於十四日接據祿勸縣知縣李世琛稟稱十二日風聞富民縣城有匪徒滋事之信祿勸係屬連界亟應趕辦城防業經檄飭在籍紳士游擊王釗招募土勇二百人以資防守等情當經批飭嚴密防範毋稍疏失去後乃於十五日亥刻忽據王釗來省報稱祿勸縣城於十三日夜被匪攔入縣令被戕懇請札委該游擊招勇前往剿辦等語臣等以該游擊係奉本縣檄飭募勇防守縣城當匪徒入城之際何以並未竭力堵禦追縣令被戕又不能帶同紳團立時剿辦核其情節支離正深詫異卽據武定州營會稟祿勸縣城於十三夜被賊滋擾當經調派兵團督飭該縣典史姚紹瓊雞街汛官張其仁等於十五日寅刻將賊匪擊散收復縣城訊據賊供王釗有濟賊軍火開門納賊情事稟請密拿嚴辦又據雪南府知府陳燦署富民縣知縣端木鴻鈞稟稱據聞此次祿勸之變係該縣紳士王釗爲賊內應現聞其潛赴省垣報信請兵希圖掩罪冒功該紳隨帶十餘人行經富民縣屬夜行晝伏形跡可疑

應請就近拿辦等情當飭標中軍將王釗拿解管押發交臬司嚴行訊究相應請 旨將副將銜補用游擊王釗先行革職歸案審辦如果審有確供當即恭請 王命立正典刑以爲通同謀叛者戒得 旨王釗著先行革職歸案嚴行審辦○王文韶奏查川滇接壤以金沙江爲界畫滇省武定州屬縣二曰祿勸曰元謀居金沙江之濱渡江而北爲四川會理州界縣互千里藏奸尤易元謀僅隔一江內地土匪往往勾引川匪過江滋擾蹤跡飄忽出沒無常最爲滇邊之害知縣傅炳堉在任年久熟悉情形防範不遺餘力一經盤獲審實立即盡法嚴懲冀匪徒稍知斂戢而閭閻良善賴以安全乃嫉惡愈甚積怨愈深本年正月該縣因解錢糧銀兩督省於十一日傍晚行抵武定州屬之冷飯鋪突遇匪徒數十人各執刀械擁至與前該令用言開導匪黨不由分說直前行兇該令隨身丁役僅止數人赤手空拳勢難抵敵登時被戕並殺斃隨從丁役四人該匪等戕官後將銀兩搶去紛紛竄逸是夜因有富民之變報由武定州馳稟前來上等查元謀縣知縣傅炳堉平日安良除暴卓著政聲求之牧令中實不可多得以查辦匪徒執法嚴明以致結怨匪人竟遭不測迹其死事慘烈憫悼實深除飭武定州將該縣忠骸驗明棺殮並身後一切事宜飭該家屬妥爲料理外合無仰懇 天恩俯准將同知銜元謀縣知縣傅炳堉部從優議卹以慰忠魂而旌臣節出自逾格 鴻慈得 旨傅炳堉著交部從優議卹○戊午以孫楫爲湖南按

察使○以張岳年爲陝西布政使沈晉祥爲甘肅布政使○己未祭 歷代帝王廟遣魁斌行禮○壬戌  
馬丕瑤奏○前以廣西人文風盛兵燹後藏書悉燬闕板無存無以爲讀書培才之助擬在省城開局刊  
書並請 旨飭下江南浙江廣東湖南湖北四川六省將局刊經史等書刷寄來粵俾得分儲擇刊等因  
一摺於十五年十二月初十日欽奉 硃批著照所請該部知道欽此○臣遵卽恭錄咨會各該省督撫查  
照並加兩諄懇去後隨准該督撫等先後咨覆咸念粵居邊徼士多寒賸同此教育之心不分畛域之見  
印寄書籍陸續咨送到粵價由各省報銷除四川路遠地偏尙未寄到已飭派便員齎領外計兩江督臣  
咨送書三十二種江蘇撫臣咨送書六十五種湖北撫臣咨送書一百七十三種湖南撫臣咨送書十六  
種浙江撫臣咨送書二十種廣東督撫臣咨送書六十七種又江西省本圖書之府近年增以局刊蒐羅  
益富○前奏漏未陳及昨見該省書目擇其最要而爲他省所未有者一十八種函致江西撫臣亦承印  
寄裏集藏籍蔚爲大觀其中經史鉅帙凡藝林承學之士所當家絃戶誦者固已燦然美備卽名物象數  
專門撰述亦頗並蓄兼收惟是官藏之書借歸私室難以徧應亦有散失之虞因爲定立章程並將書本  
鈐蓋關防以防日久盜換創建書樓書室俾多士得以就觀而士子散居各屬書籍聚於省垣有志者轉  
憾道途修阻弗獲稽求允宜分置各郡庶窮鄉僻壤均得觀摩誦習各省刷寄均係每種十部以九部分

撥潯州柳州梧州南甯太平泗城百色鬱林歸順等府屬州以一部置省垣書樓其餘平樂慶遠思恩鎮安等四府及龍州一屬如各省送到書籍較多即以數十種分存備閱免令向隅臣於省城獨秀峯麓書院之側建造書樓書堂規模雖具經史子集分別部置皮藏完整酌派員役專司其事並諄飭藏書各屬按照省城章程辦理均擇書院及公所地方修建書樓上藏書籍下爲士子看書之所臣均親詣區聯懸挂並於巡閱所至逐一親往察看尙皆軒爽妥貼由地方官紳公同經理以期垂諸久遠現在各屬士子看書者更番疊進頗不乏人實有鼓舞奮興之氣臣維我 朝稽古右文超越前代乾隆中 欽定四庫全書告成 特命繕寫全冊建三閣於江浙兩省俾士子咸得就觀傳寫 嘉惠士林 恩意無微不至是以名臣碩儒接踵而起人才之盛煇耀古今髮捻之亂烽火遍諸行省海內藏書燬失不少邇平以後曾國藩李鴻章左宗棠等皆孳孳以此爲務所至輒設局刊書二十餘年網羅散佚漸復舊觀江蘇浙江湖北四川廣東諸省又皆創建書院廣儲典藉令諸生肄業其中歲時講論文風學術蒸蒸日上臣今此舉竊願士子窮經勵志化弁陋爲鴻博胥成有用之材凡有詣樓觀書者臣皆進而勉之務臣講求實學裨益身心從此俗返敦龐人文蔚起庶仰副 聖天子作人雅化爲至省局刊刻六經四書讀本及孝經小學集解均已工竣印發各屬分售散布俾讀書者咸獲晉本土民極爲歡欣又圖民錄一書數陳治理

深切著明爲居官之寶鑑亦已刻成任地方者各手一篇於吏治不無裨益此外應刊之書仍陸續籌款刊發以臻賅備而便士林合併陳明報聞○洪良品奏 天庾之儲關繫 國家大計閭閻所供億疆吏所經營海運河運所遞送千辛萬苦納之太倉而 朝廷復特簡重臣總司其事凡以根本之地足食爲先則膺是任者宜如何盡忠竭力以副斯職未有廢公營私致倉政之壞如興廉游百川者也臣前奉命察倉二次已將倉中各弊瀝陳在案憶初查祿米倉時見其倉門不閉偷漏甚多請 旨飭下倉臣認真整頓乃該侍郎並不實心經理徒飾奏云因時制宜漸收實效及去歲澈底盤驗竟虧米十六萬石之多其所謂實效者安在此其欺飾之罪不能掩者也及 臣查北新倉時見米數與報冊不符留心細察果見市偷數十人不持領票來倉偷運見 臣至始散比卽移文令將花戶交城嚴訊而該侍郎反代爲飾辭云並無其事此其包庇之罪不可解者也各倉之內原設官廳爲監督駐守之所乃近來監督並不駐倉防範每另擇一僻靜之地棲止故避耳目一任花戶所爲 臣深知其弊屢舉舊例爲言乃該侍郎變亂舊章聽其自便並不嚴加約束此其縱弛之罪不容諉者也廩座倒塌雖多所剩木植磚瓦歸併拆修尙堪敷用乃該侍郎每年扣存部庫銀二萬餘兩聲明三四年後各倉廩座一律修完乃閱時已及四年用銀八萬四千餘兩而所報修整之廩祇有興平南新舊太富新太平儲濟六倉且據倉犯供招仍有勒令花

戶自行賠補之說而所扣部款不知作何開銷此其侵竇之罪尤其顯著者也以該侍郎主持倉務如此侵欺如此廢弛是以上行下效視爲固然監督之習日偷花戶之贖日肆遂至倉政日壞漸有不可收拾之勢臣竊以爲正本清源之道全在倉臣得人不得其人良法終歸無用然人心之張弛全在朝廷之舉錯合無請 旨飭振王公大臣按臣所陳各款秉公察核並將現存各倉米石考究虛實倉臣浮冒部款推尋下落至於黜竊舉賢在 宸衷自有權衡非微臣所敢擅便臣職司糾參不敢不據實以聞又奏臣讀戶部則例所定倉務章程纖悉畢備卽戶部新議四條亦皆斟酌盡善惟於各倉致弊之由尙未議及臣現察倉已歷三次其中情弊尙知大略請試言之一由於監督之不擇人監督賢否關係倉務最重近來監督到倉每利花戶規費實有明知故縱情弊盡花戶之規費全出於米花戶不盜米則陋規無出監督若駐倉驢坐倉門則運米者有礙眼目不得不另擇僻靜之地以爲掩耳盜鈴之計故戶部所議坐倉驗票防範非不周嚴而無如其私相勾結也倉場侍郎遠駐通州耳目雖所難周然使其志切奉公一經御史揭出弊端自應卽時撤查協同嚴辦乃該侍郎意在彌縫一惟監督之言是聽彼卽得所徇庇抑何所憚而不爲裁制之之法請嗣後御史參出倉弊先將監督撤任另派大臣查辦則倉臣無所施其迴護而監督或稍知儆懼矣一由於花戶之無防制花戶伎倆惟在盜米出售而輩運策重非如銀錢輕賡

易於攝取乃倉門既無關鎖花戶任其出入於是私設米局運銷無忌復有無賴棍徒乘其運出倉門徑行搶劫花戶被其禁制不得不以賄免或卽引爲身後辦事之人謂之喫倉而其耗費無一不出於米制之之術惟有每倉派令花戶分厥承領不獨易於盤驗抑且實有專歸再輪年撥厥以放代盤某厥有虧惟某花戶是問花戶自不肯代人受過卽有弊亦一望可知矣一由於倉門之無關鎖臣查各倉厥門大半破壞甚至無門者有之皆不曾加封鎖易曰慢藏誨盜情弊尤屬顯然語曰以敝坊爲無用而棄之者水必及之事正相類請飭下倉庫將厥庫門戶修理堅完必以大鐵鎖鎖固再令御史嚴密加封如有揭破紙迹立將花戶懲辦似此多一制防於倉務更爲有益矣一由於收米之不報聞向例收米必報御史查驗米色如有潮溼蝕水等弊御史何難立時參辦乃臣查祿米倉時花戶必於收米完竣後始行來報臣言之再三不應已經奏陳在案頃倉犯供稱米未入倉卽有虧短豈知其虧短亦半由米未入倉蓋臨收米時花戶或勾通庫戶將米運入私局而經紀庫戶亦乘機以發水之米交倉借抵花戶亦甘心收受不辭事前則通同作弊事發則彼此諉過是以溷米入倉全倉爲之蒸變其弊實由於此監督則置之不問侍郎更所不知請於收放米石若花戶不先期報聞或別有舞弊之處許令御史將花戶徑交刑部訊辦則花戶有所畏懼而一切弊端可以漸革矣一由於侍郎御史不聯爲一氣京通有十七倉之多區



區侍郎一二人精神豈能周給故 朝廷爲各倉設一御史代爲巡察法至密也乃該侍郎不知御史爲分其勞反恐御史或揭其短臣前查祿米北新二倉移文告以花戶竄弊往往付之不答臣不得已乃爲入奏請 旨飭其整頓乃更奏稱臣不知弊端所在妄言整頓卒之虧短事發言已非虛又以失於覺察自解雖御史中亦間有藉端勒索者現有懲處恩霖例在自足禁制豈得因噎廢食臣雖無狀自問不敢昧良三次巡倉深愧涓埃未報每願得一憂國如家之人與之和衷釐剔但恐呼應不靈終至隔閡貽誤其應如何咨行抑或稍假便宜之處還求 恩旨裁定臣爲救弊保公起見所陳悉皆實在情形並請飭下王大臣會同戶部酌議施行臣更有請者倉儲爲 國家命脈及今不爲整理設南漕有阻素無儲積何以預備不虞臣聞得去歲順直水災 皇上諭發京倉賑濟每開一倉米多霉變不可介若無新漕勢幾難以應命雖人言如此未必無因理合附陳伏乞 聖鑒 上諭給事中洪良品奏倉臣侵欺廢弛請飭查辦並條陳整頓倉務事宜各摺片著派貴恆許應麟會同戶部確查覆奏○癸亥祭 先農壇遣凱奉行禮○甲子宮勒銘額魏光燾奏臣魏光燾前於光緒十六年四月初六日具奏擬辦伊犁地方事宜大概情形摺內陳明伊犁向分旗屯兵屯回屯民屯旗屯地畝應由將軍飭令畫丈計戶授田聯成片段不與各屯攙雜以示區別等因於光緒十六年五月初九日奉 硃批該衙門知道欽此臣等伏查伊

準滿營承平之時向有旗屯地畝發給閒散壯丁耕種藉資養贖迨兵燹後地方蹂躪以致兵民蕩析離  
居旗民屯地久已荒蕪渠畔被水衝刷半成溝澗經界不清無以區別仰賴 聖謨邊圉重定正值新疆  
議開行省設立郡縣從前歷任將軍大臣皆未暇計及臣等和衷商辦凡有關於地方興復事宜靡不悉  
心諮訪妥爲經營現當滿營甫經規復一切舊制亟應次第舉辦伊犁雖有旗民屯地聚置年久此時清  
釐劃分勢同倡始又因籍卷遺失無案可稽訪諸地方子遺兵民咸莫知其所以或有一二知者及至其  
地半爲水衝沙淤其係旗屯某爲民屯漫無分別若非親往履勘何以正經界而分旗民之屯臣當勒銘  
額率領滿營協領暨綏定甯遠兩縣知縣暨後局委員等遍履踏勘自塔勒奇上游屯地引用泉水灌溉  
綏定城以東牛泉灣紅山嘴至新舊惠遠城紅柳灣屯地以及城東北一帶屯地皆引用烏哈利克河及  
通惠渠水灌溉稻地通惠渠中渠南渠屯地皆引用伊犁河水灌溉阿齊烏蘇渠屯地引用哈什河水灌  
溉惠甯城屯地引用闡里沁莫爾圖阿里木圖河水灌溉自闡里沁疏濬水磨渠迤南阿齊烏蘇渠迤北  
屯地引用闡里沁河水灌溉以上統共查勘旗屯民屯綜計可耕之地十二萬八千餘畝此項地畝向不  
與兵屯回屯交涉臣當勒銘額就地現已查勘旗屯民屯悉心酌核公同分撥擬將塔勒奇上游屯地約  
八十餘畝阿齊烏蘇屯地約五萬四千餘畝自闡里沁水磨渠迤南阿齊烏蘇迤北屯地約五千餘畝共

六萬七千餘畝均撥歸民屯交綏定甯遠兩縣接收經理招戶屯墾自綏定城邇東牛象灣紅山嘴至新  
舊惠遠城紅柳灣屯地並城東北一帶地及通惠渠地約一萬七千餘畝稻地通惠渠中渠南渠地約九  
千餘畝惠甯城引用關里沁莫圖阿里木圖河灌溉地約三萬五千餘畝共六萬一千餘畝均撥歸旗屯  
內除教場新築惠遠地基貿易園以及官兵民人墳塋日行小拴馬廠並筆湖沙磧之外僅有可耕之地  
約三萬八千餘畝按輪年歇種實得地一萬九千餘畝就近撥交滿營飭令兵丁及時播種秋收後所穫  
糧石交倉存儲以備不虞惟思伊犁地處極邊巡防操練尤宜隨時講求每於該官兵贍贍之暇督飭勤  
加操演庶於整頓營伍兼習耕作均有裨益下部知之○剛毅奏吳淞江河道爲蘇州松江太倉等屬賸  
出水利所資且當浙江下游宣洩尾閘尤關緊要自道光六年前撫臣陶澍經 旨飭挑以後同治十年  
略加浚治今又六十餘歲淤墊日甚前年秋雨連旬河湖汎溢積淤既無消路涸復更自積時推原其故  
實緣地利久失疏修致遇天災莫從補救在歷任撫臣未嘗不綢繆計慮本係節經勘估奏明必應辦理  
之工無如此江地段綿長且向屬民捐官辦是以屢議中止迄未興修近來災歉頻仍若再因循坐誤則  
年復一年積淤愈厚需費愈多辦理愈形棘手輿情急迫詢謀僉同臣所以決議開工不敢畏難苟安者  
此也上年春間奏挑蘆漢河原爲此江導其先路嗣經臣督同前蘇州藩司黃彭年通盤計算摺被注駁

惟查有歷年解存司庫之各屬攤徵河工本款暨賑捐餘款及積穀生息項下所存銀兩可以儘數湊用此外別難備撥但核與原估數目尙自懸殊即使設法變通逐層節省仍不得不借助防營勇丁以補經費之不足再四熟籌市能定議臣與原任督臣曾國荃往返函商適於去年十月派委廉幹之員候補知府周蓮等駐工開辦並調撥營勇協同民夫分認工段通力合作當將開工日期附片奏明在案臣隨時輕裝減從屢赴工次躬自勸助經冬及春營段將次完畢民工亦過大半雖人夫雲集河工不下萬餘而臣策盡力兵民相安同戴 皇仁衆心尤形踴躍沾體塗足舂鋤勸施臣舟輿所至目擊各員弁及董事人等皆能認真督率屬催不辭勞瘁查閱河身一律較舊槽加倍深通便於宣洩均無草率偷減情弊統計工程袤延七十八里所有應挑土方皆從此天氣暢晴工作無少間阻大約於三月底即可全行告竣屆時臣仍當親臨驗務期工歸實濟費無虛糜以仰副 聖主懷保斯民之至意臣覆查道光年間民風敦樸物價廉平前撫臣攢節從事猶且需費至三十四萬餘兩之多今則百物騰貴迥異昔時此江既係萬不可緩之工人情又處迫不可支之境而經費視前數僅用三分之一非臣初議所及所以能濟事者全在借助營勇節省浮費各員弁力任其難始克收茲實效現由臣周歷撫諭俾益知奮勉趨公克己經營分頭體辦衆舉易舉一氣呵成誠足上紓 宸廑此 臣勘視之實在情形也至此次開浚吳淞江在

工文武員弁等因屬職分所當盡惟工段長而經費省其中設法籌畫若非殫竭心力而冷衝寒風夜露維亦恐未易集事如蒙 皇上逾格 鴻慈念其著有微勞准俟全工告竣擇其尤爲出力者由臣另行奏懇 恩施不敢稍涉冒濫其出力稍次人員在外分別記功給獎以昭激勵得 旨著准其酌保數員毋許冒濫○長順奏吉林地方遼闊所轄境內東北兩面山嶺尤多山內每有採參以及伐木捕獵窩棚率皆外來謀食流民其中良莠不齊與逃竄餘匪每多潛往隱匿非負隅以抗官兵卽借此爲藏身之固奴才到任後曾經派隊巡山剿辦近來復將山內各營棚均散給票照門牌並給腰牌以別良莠無如山路崎嶇樹林叢密每逢春夏道途泥更難行走凡營哨各官弁帶領馬隊入山搜查往往留馬山外改爲輕足又慮馬無寄養未敢深入久留蓋山林之中利於步而不利於馬地勢使然明知用步爲宜而有時復派馬隊入山者以通省步隊無多不敷調遣故也伏念行軍之道既知地形尤須得地利捕盜亦不外是入山剿賊與其借資馬隊而用違其長曷若添設步隊而用盡其利第添隊卽須增餉奴才再四籌思並飭各翼長等妥議惟有仍就原餉變通章程改添隊伍以期增勇不另增餉之爲得查吉林吉勝驍勇兩營舊設官弁勇夫五百四十二員名月支餉銀二千九百二十四兩八錢現擬與舊設官勇額數之外再行添練步隊官弁勇夫三百五十八員名每月增支餉銀一千六百十六兩二錢並查吉林舊設洋

鑄幣內尚須添設委筆帖式二員俾資辦公仍須酌加心紅銀兩統計每月共增支餉銀一千六百三十二兩二錢所增餉項不必另行添支請卽由吉林通省演練馬隊內抽裁餉銀一千六百四十五兩以之抵充新增餉項有盈無絀如此一轉移間庶幾搜剿山內盜匪調遣步隊可資應手且收實效謹將變通營制餉章及抽裁馬兵抵充增餉各數目繕單恭呈 御覽如蒙 俞允再將抽裁添募改支餉稽日期續行奏明辦理得 旨著照所請該部知道

三月乙丑朔諭懷塔布奏查勘 福陵明樓等處應修各工請擇吉興修一摺著欽天監於本年四月內選擇吉期先行知照卽著盛京將軍會同工部侍郎屆期敬謹興修○馬丕瑤奏 臣出省閱伍沿途所經土司各屬土民紛紛以土官抑勒阻考不令上進具詞呈訴均批所轄府縣查覆並隨在訪查情形土官中庸陋者藉端漁利有之狡猾者慮其上進或與抗衡故爲抑阻有之土民椎魯全在勉以讀書明理化其獷悍似此抑勒殊於風俗人心大有關係亟應妥議禁革伏查學政全書康熙五十九年禮部議准廣西土屬子弟有文理清通者先令就近流官州縣附考取進其名數俟該撫酌量人文多寡具 題定議又雍正元年議准太平土州設立學校定額取進四名又嘉慶十年奉 上諭那彥成等奏議廣西土民向學一節嗣後退種土司糧田之正民雜民准其呈明應試該土官不得藉端阻擾其番哨隸屬等項土

民身充賤役向不准其考試仍循舊規辦理該部知道欽此又查禮部則例內載廣西土民佃種土官之田聽土司役使充兵果有志上進退還所佃之田實無原籍可歸者准令土司送考又道光二年兩廣總督奏定章程除承耕土司役田各戶仍照舊例不准考試外其承耕糧田各戶與內地佃戶無異無論曾否退田俱准送考各等因統查學政全書禮部則例廣西土州縣惟太平土州定有學額四名此外本就流官州縣附考因退佃土田之戶有准土司送考一語遂致藉端勒索抑阻諸弊叢生應卽釐訂章程以除積弊擬請嗣後各屬土民除身充賤役之番役隸置各戶及承耕土司役田供役之戶不准應試外其餘無論何戶均准赴承審之漢州縣及徑歸管轄之知府報名考試照苗童應試用漢廩生一名苗生一名不論廩增附生公同聯名保結之例用認識土生一名會同漢廩生聯名結保以查混冒如此辦理將見土屬人皆涵濡聖化胥成文物之邦再土屬地方有祖父先人已讀得應試而子孫未能相繼隔數十年復有後裔出而應試者率指爲冷籍土官廩保皆向需索阻撓尤爲惡習應併嚴禁以廣登進合併陳明下禮部議奏○丁卯奉斌承德奏察哈爾八旗分設口外拱衛京師原爲安置蒙民休養生息操練射獵之所且有駝馬牛羊各羣牧並置站草地分隸各旗專資牧養定例游牧不准開闢其時水草肥美牧畜孳蕃屹爲近邊重鎮自咸豐年間各王公馬廐因年久空閒多有私墾之處嗣經戶部奏准馬廐

報勘升科遂漸紛紛報墾例禁既開地方遼闊各旗聚積客民日衆爭奪地畝訟務繁興口外從此多事  
道光緒六年奉 旨清查由直隸山西委員出口勘辦當將各王公廟地已墾之處按畝勘丈委係無礙  
游牧一律發給印照報部升科直隸於光緒八年奏結山西於十一年奏結均經嚴飭嗣後不准再行私  
墾原冀從此耕牧相安蒙民樂業不意未經數年奸民地棍故智復萌串通開展暗中侵佔而各旗呈報  
新地多有越界私墾情弊旗廳均未隨時查禁以致開墾日甚若不早爲清理禁絕實於牧政大有窒礙  
且地被民人侵佔多一畝農田即少一畝牧地蒙百生計日促其勢亦斷不能兩立光緒十五年十一月  
十九日奉 諭旨張家口私墾地畝著李鴻章會同察哈爾都統認真清理其有礙游牧者永遠禁止以  
杜紛擾等因欽此查察哈爾左翼各旗地界歷年開墾馬廠均已分隸各廳境內奴才奎斌到任後據各  
地民戶以馬廠續開地畝請查勘升科呈詞紛至沓來而各旗呈報站群報民人越界私墾之案亦連篇  
累牘詳加訪察近年續開地畝其數係馬廠餘地次第墾熟者固有其事而奸商勾串蒙古私開並民人  
越界侵佔牧地者正復不少洵如 明諭必須認真清查茲與督臣李鴻章往返函商擬即揀委大員前  
赴口外查辦將實係馬廠界內無礙游牧之地勘丈升科循照光緒六年直隸舊章辦理如係越墾牧地  
應將勾串之蒙民嚴加懲治退地歸公務使耕牧判然旗廳之界限既清主客之爭端自絕此次私墾之



地連山西者居多豐鎮並有私羈牧地之案自應一律清釐並請飭下山西撫臣劉瑞祺據派廉正勘明熟悉邊務之道府大員會同奴才衙門委員酌商籌辦兩省同時舉行可期迅速集事具如何詳定章程永遠禁止之處統俟辦竣奏結時請旨遵行以副聖朝惠愛黎民慎重牧政之至意得旨即著知照山西巡撫派員會辦○癸酉以溥良為內閣學士○丙子諭御史劉綸奏吏部升選錯誤請旨飭查一摺據稱河南衛輝府一缺到部已經選用之御史曾培祺於二月十九日始行引見開缺在前補缺在後承辦官有心迴護等語著吏部查明覆奏○戊寅鹿傳霖奏陝省兵制未復從前因時制宜邊腹要區酌留馬步防勇扼駐巡防並挑募練軍居中策應原留營勇尚多嗣後疊次更章裁減每歲額餉較承平時尤少現存馬步防練各軍勉強分布殊覺地廣兵單界連五省北山瘠苦較為安靜南山素多會匪平原近處因近年河南山東頻遭水患閩陝省招募墾荒各民紛紛東來良莠混雜加以川楚會匪甘隴撫回往往勾結本地匪徒乘隙劫掠處處均須防緝臣到任以來各處具報強劫傷人搶奪婦女之案層見疊出而平原地方為多屢經嚴飭各旗營會同地方文武認真查拿凡破獲賊賊之案大半得力於馬勇良以平原利於騎兵匪蹤飄忽得賊潛遁各旗分防地段恆有數十里或數百里不等追聞報追拿步勇每苦不及惟馬隊便捷奮迅跟蹤掩捕圍拿最為得力故賊甚懼馬隊呼為鷹爪以其追捕神速不

易逃避也。臣體察情形亟以添練馬隊爲宜。然經費支絀，餉項有定，未敢遽議多增。再四籌度，謹就現時兵餉額數酌量裁步改馬，以期得力。查陝省防軍馬隊現存撫標中營一營，官弁七員，馬勇二百一十五名；西林馬隊一起，官弁三員，馬勇連夥勇一百六十八名；左翼馬隊一起，官弁三員，馬勇連夥勇一百三十七名；右翼馬隊一起，官弁三員，馬勇一百一十名。練軍馬兵則只親兵一哨五十名。前撫臣隨時裁併人數既多，寡不齊月，餉亦參差不一。臣現擬改定劃一章程，將原存防軍中營馬隊加足馬勇二百五十名爲一營，並裁撤前旗步隊以月餉改練馬勇一百五十名爲一旗，名曰撫標前旗馬隊。將西林馬隊裁去夥勇亦定爲一百五十名。謂之後旗馬隊。並將左右兩旗馬隊各定爲一百二十五名。又將練軍義精營裁撤改練馬隊，連原存馬兵五十名共成二百五十名爲一營。合計防軍馬勇一營四旗共八百名。練軍一營馬兵二百五十名，統共馬隊兵勇一千零五十名。每營各設營哨官弁七員，每旗各設營哨官弁四員。薪水公費俱照舊章定擬。馬勇月餉一律改爲六兩六錢，通盤核算以步改馬，挹彼注茲，每月約僅增餉銀一百餘兩。每歲共只增銀一千數百兩。如此量爲變通，增餉甚微而獲益甚大。臣一面分飭各旗營自本年二月起遵照辦理。一俟挑募就緒，卽實成各該管帶將新舊馬隊在於平原各屬及北山邊境與步隊分別扼紮聯絡，聲氣隨時督飭認真操練巡緝，以安閭閻而固邊圉。一切詳細章程另開清單送

部得 旨如所請行○升泰奏竊奴才前以納金丈結洛納等山爲赴哲捷徑擬請添兵駐守當經具奏並繪圖貼說咨送總理各國事務衙門各在案旋於光緒十六年十月初八日承准總理各國事務衙門咨稱是否卽照前擬兵數量爲移紮抑或另議加增飭令體察情形悉心籌辦詳細具奏奉 旨依議欽此等因承准此竊維通商之舉原爲敦睦外邦起見似不應計及兵守啟彼猜嫌但藏印交界各屬草昧初開半人跡未經之地奴才前於赴邊時留心查察竊見沿邊各隘處處皆通原有防不勝防守不勝守之勢且一旦舉辦通商互市初開百商雲集機越偷漏在在堪虞前擬於靖西關內外添設官弁兵丁不過於稽查彈壓之中寓防範綢繆之意嗣因巡閱後藏派員查看鄂博始知納金各隘爲通哲捷徑而納金距扎什倫布僅三日程爲從前所未聞又復請添兵駐守查原奏內稱值此籌款維艱當以兵力餉力兼權並顧且據稱鄂博各處今昔情形不同究竟應添兵若干山何項武員管轄片雷剛銀若干各等語竊查藏地南瞰英人西窺俄國踞上游之形勢爲中外之樞紐且下通商游歷創前古未經之局奴才當目隱憂亟思籌備故前於納金設防及密陳藏番交通俄人摺內約略言之爲思愚預防之舉承准前因國家經費有常奴才自當仰體時艱力求撙節查納金丈結洛納等山均屬緊要而納金尤爲密藏既經查實何敢稍事疏虞致滋貽誤可否暫由奴才前擬靖西關兵數內量移靖西關內外委一員兵丁二

十名駐防千總撥往納金一帶隘口梭巡仍歸靖西遊擊管轄以一事權月需餉銀仍由前擬兵數內籌撥千總設番兵二十五名向歸該處營官管轄擬再由後藏番營添撥番兵二十名協同駐守以示周密通商後地方果能靜謐即可藉以稽查不須更易若向需添兵駐守再由奴才隨時察看情形酌議加增以副 聖主慎重邊陲之至意得 旨該衙門知道○升奏奴才前擬在仁進岡格林卡古碼橋一帶修闢建署增設官弁兵丁分別奏陳欽奉 硃批著照所請該衙門知道欽此欽遵查前奏內稱格林卡地方設遊擊一員千總一員外委一員靖西外關之亞東地方設千總一員古碼設外委一員又帕克哩設把總一員共計遊擊一員千總二員把總一員外委二員新增漢兵一百名各在案除一面派員辦理督後三端事竣後再將邊牆衙署妥速興工外所有增設弁兵若均由奴才咨川飭調來邊鎮駐既不免往返需時且初次來防人地未必相宜長途跋涉又需請領行裝諸多糜費尙不知何日到防邊防重務勢雖久延在在均多窒礙刻下邊務需人奴才留心查看前後藏官弁台民能事精壯者尙不乏人自應就近拔募以期迅速到防查遊擊一員職分較繁應由奴才會同成都將軍四川督臣提督斟酌具奏請補外所有千總二員把總一員外委二員現已咨會該將軍督臣提督轉飭各標鎮協營卽將已出未補之千總弁缺二分把總弁缺一分外委弁缺二分馬糧十分戰糧四十分守糧五十分各空缺分別咨

送來藏由奴才斟酌在藏邊拔募庶足以收實效而歸簡易於防務不無裨益下部知之○升泰奏奴才前准四川督臣劉秉璋來咨承准總理各國事務衙門電音僅令派員前往領上會議暨後三端等因當將委員稽志文患病及改委西藏糧員黃紹勳即選府教授張昉各緣由附奏並咨由四川督臣摘要電達該衙門先行代奏各在案旋於光緒十六年十二月初二日准赫政來函有擬於日內前赴孟加臘探詢三條辦法之意須數日內方能回嶺等語是以未遽派員前往茲復由赫政處函轉承准總理各國事務衙門電音飭催等因當即遵令改委邊務營後委員黃紹勳張昉前往會議並由第穆呼圖克圖揀派僧俗番官各一員均於光緒十七年正月初六日先後起程赴嶺得旨該衙門知道○已卯諭前據御史劉綸奏吏部升選河南衛輝府一缺辦理錯誤承辦官有心迴護請旨飭查當經降旨令吏部查明覆奏茲據奏稱本年二年內出有衛輝府知府一缺曾培祺應選在先劉綸奏名在其次曾培祺於上年十二月初二日起復到部江南道御史係於十二月十五日見缺均在本年正月二十八日衛輝府奉旨開缺日期之前曾培祺補御史早應引見因十二月十五日以後及京察覆命以前不能帶領是以於二月十九日引見其補缺係在二月二十日截缺以前升選之缺不論其缺先後歷經辦有成案曾培祺無應扣之例是以將該員擬選並無錯誤亦非迴護等語此次該部升選衛輝府知府一缺既據查明係

按照月選定例辦理並無外銷情弊卽著毋庸置議河南道御史雖有監察吏部之責惟劉綸襄以其次應選之員不諳例章率行瀆陳殊屬非是劉綸襄著交部議處○辛巳楊昌濬奏陝甘茶務經前督臣左宗棠招商試辦以票代引計五十引爲一票每引納庫銀三兩銷竣繳票完釐已奏明奉准在案光緒十二年經前督臣譚鍾麟續發第三案茶票共計四百九張並聲明八年所發之票每歲約銷一百餘票此時雖未銷罄而商人是年領票明春入山採茶運到涇陽成封已在秋間運赴關外約在十四年春夏計自十四年至十八年歲已三週係應領票之年特以私茶充斥官引滯銷至今尙未銷售完竣茶商坐耗成本苦累不堪雖屢經出示嚴禁無如陝甘新疆地方邊關稽查難周求其盡絕根株實覺匪易前據各商以連年虧累力益不支懇將應納課銀仿照准鹽章程先行繳課向章每票應繳課銀一百五十兩此次擬分作三分先繳二分課銀一百兩其餘一分五十兩俟運茶到關盤驗時同釐並繳臣查恤商乃可裕課該各商既以成本坐耗虧累滋甚不得不稍予變通以示體恤且下餘課銀俟盤查時同釐並繳於公家尙無妨礙而該商等實受益不淺當經批准照辦茲據蘭州道轉據各該商請領第四案茶票前來仍照三案發票數目分別填給照章掣檔輪銷俾杜弊混並因接奉部咨整頓茶務在於各商原存大成票根內加發懸票十張以冀漸圖復舊又添發甯夏茶引一百七十道填票四張共發票四百二十三張

計引二萬一千一百二十道先繳到課銀四萬二千二百一十兩由蘭州道批解藩庫收存詳請奏咨前來臣查陝甘地廣人稀茶務驟難復額目前祇能如此辦理仍俟試辦數年再籌推廣之法俾期漸復舊制下戶部知之○壬午劉秉璋奏重慶開辦通商停止輪船上駛一案前經臣將籌辦情形並請鑄發關防奏奉 硃批著照所請該衙門知道欽此轉行遵照在案嗣經稅務司好博遞來川經署理川東道張華奎體查川江情形仿照宜昌關一切章程並接總稅務司議章二十條量爲刪改稟經臣按款稽核由該道鈔錄先後章程分飭南北洋大臣復經臣將該道先後議章咨請總理各國事務衙門核覆亦在案茲據署川東道張華奎具詳現定於光緒十七年正月二十一日開關所有監督關防尙未到川請暫用川東道關防一俟監督關防到川再行定期開用此次新關創始亟應分派委員調遣書吏招募各項差役丁壯分撥關署大關及子口等卡各司其事凡員役應發之薪水工食大關應修之碼頭跳板船暨巡哨礮船查河划船渡江行船並三卡辦公之所修整房間置備器具皆係必不可少之件卽有必不能省之需自應酌定月支經費以資舉辦查重慶商務大致與宜昌關相埒應用款目卽與宜昌關相同惟川東民情浮動華洋之情扞格已久辦理尤屬繁難若過求撙節恐多貽誤茲照宜昌關原定支款除稅務司經費外計每月共支銀二千五百餘兩較之宜昌關有絀無盈仍照宜昌成案分別應支緩支各款每

月計銀三百九十二兩應俟關務暢旺再請照支此外製造礮巡哨座等船購買礮位軍械並開關雜支各款統俟修購齊全另行造報仍於試辦一年後察看情形如有應行增減之處再當酌辦所有應支緩支各數目造冊詳請奏咨前來臣查重慶商務大致與宜昌相埒應用款目即與宜昌關相同該道參酌宜昌關成案所定月支經費較之宜昌關實屬有減無增合無仰懇 天恩飭下總理各國事務衙門會同戶部核復飭遵再查宜昌關開辦伊始一切經費先在鹽局提用此次重慶關開支經費亦請在於重慶鹽局暫行提撥俟一年後稅收暢旺即於關稅項下開支並將提撥鹽局之款照數歸還各清各款以免牽混下所司議奏○劉秉璋奏正在繕摺間續據署川東道兼重慶關監督張華奎詳稱前於應支關用經費詳內聲明製造礮巡哨座等船購買礮位軍械另文造冊開報在案伏查重慶華船通商上則二水分流下則路逾千里視宜昌事更繁重故需船之多寡不同且節節險灘深溜急凡繩纜篙橈隨船之器與駛船之人較宜昌沙市間平流上下經費之多奚啻倍之該道現定各項船隻勇丁水手數目仍暫照宜昌關章程量為酌減明知不能敷用但關方創始稅之衰旺未能預期經費有常自應力求撙節現經派員將應造各船核實估計再三駁減實共需銀二千九百九十八兩與當日宜昌關准銷船礮等項價銀總數大略相等其中散數較宜昌關稍多數兩者實由川楚工料低昂不同所致並無絲毫浮冒



擬卽一面購料修造以資應用至開關雜支各款亦照宜昌開辦成案需銀六百九十一兩由該道自行籌款支發不列報銷等情造冊詳請奏咨前來臣查川江節節險灘其應造各船較之楚省更形煩費今查核該道現造製備船礮等項清冊考其總數實與宜昌開辦銷數目不相上下謹繕清單恭呈 御覽得 旨覽○癸未張煦奏 臣忝膺疆寄責在守土於無事時應作有事想溯自軍務肅清以來各省遣撤湘勇紛紛回籍其中安分者固不乏人而桀驁成性游手好閒既不慣力勤耕作又別無可以營生遂至流爲會匪者亦復不少該匪等匿跡湘鄉往往轉相勾結放飄滋事如從前安鄉縣土匪張星來安化縣會匪毛世發上年澧州會匪廖星階等倉猝搆擾防不勝防幸均卽時撲滅不至燎原所恃防營分布得以應手剿辦以遏亂萌是整頓防營備豫不虞尤爲先務之急臣到湘將及一年細心體察去年秋冬出省閱兵周覽地方形勢查看各營駐紮處所從前布置不爲不周似尙有應行參酌變通之處當與各營將領並在省司道統籌全局量爲歸併損益務使暮布星羅聯絡一氣一營得一營之用如遇缺題又總兵劉福興統帶毅安大營勇丁二千七百八十名分駐省垣城上暨城外金盆嶺黃倚港南路之寶慶府新化縣西路之辰州府溆浦縣沅州府黔陽縣靖州並綏寧會同等縣綿亙一千數百里該統帶駐紮辰州平時稽察照料既應難周遇事調遣動需時日實有鞭長莫及之勢擬將駐紮省垣之毅安副前營

後營共勇八百名卽改爲撫標前後營作爲東路以符名實毋庸由該統帶遙制駐紮寶慶之毅安右營  
勇丁四百名撥歸原駐益陽安化之記名總兵劉樹元兼統連伊自帶親軍樹字營勇五百名移駐衡州  
府分防寶慶新化衡山湘潭等府縣以補南路之不足尙有毅安中左前三營連親兵共勇一千五百八  
十名仍歸總兵劉福興統帶駐紮辰州府分防溆浦靖州綏寧沅州黔陽及會同之洪江等處專顧西路  
至前駐衡州府之振字前營移紮樹元親軍原紮之益陽安化一帶與振字中左營合爲三營共勇一千  
五百名駐防岳常澧等府州並分防龍陽華容及洞庭之南北二洲安鄉之三汊河等處查岳州府爲入  
湘門戶澧州素爲會匪出沒之區南北洲客民麇聚匪徒痞棍實繁有徒現辦清丈營後事宜關繫尤爲  
緊要現在振字三營分地防守勢敵力均不相聯屬設有事故號令無所秉承不可無員統帶查有在籍  
前陝西興安鎮總兵余席恩堪以統帶卽令駐紮岳州府並分防澧州常德龍陽華容南北洲及安鄉之  
三汊河以顧北路以上劉樹元余虎恩均令自帶一營不給統費其原駐南路永州府分防郴州道州江  
華永明桂陽等處之儘先副將楊名璧統帶親軍一千八十名仍令照舊分紮此外記名總兵彭炳武管  
帶虎字營勇五百名駐紮澧陵攸縣瀏陽等處把總嶺鵬舉管帶巡緝練勇一百名駐紮南洲九都等處  
又管帶衛隊親兵二百名補用守備李壽因不甚得力撤委改派候補參將王禮坤管帶仍紮省城及城

外之濱官地方均仍其舊無事各守防地有警隨機策應以輔各路兵力之所不及崔鵬舉尤警偵探賊踪緝捕匪類以備不時調遣如此略爲變通防地遠近既均兵數多寡亦不甚懸殊平時巡防彈壓各專責成何處有事就近赴機應急如身之使臂臂之使指呼應亦較靈便俟各營分駐既定再將駐紮處所繕具清單恭呈 御覽仍由臣酌量輪流更替調省查閱考驗倘有訓練不精及虛冒剋扣等弊卽行嚴參務使兵歸實用餉不虛糜以仰副 朝廷整飭武備之至意水軍總兵陳海鵬統帶選鋒水師中前後左右營共弁勇一千六百四十四員名分紮省河安化益陽沅江澧州安鄉岳州華容武陵湘陰龍陽石門南北洲湘潭等處記名總兵劉永清統帶長勝毅安水師共弁勇四百一十二員名駐紮辰沅常德會同之洪江等處又記名總兵黃德管帶澄湘水師弁勇三百三十七員名駐紮衡州耒陽常寧衡山等府縣巡查均尙得力自可毋庸紛更得 旨如所請行○甲申諭裕祿等奏查勘 昭陵角樓應修工程請擇吉興修一摺著欽天監於本年四月內選擇吉期先行知照卽著盛京將軍會同工部侍郎屆期敬謹興修○沈集成松椿奏湖南堰圩墾所管之洪澤湖凡淮揚水道利病漕務鹽務農商生計均繫乎其間自禮河敞放多年全湖之水由此下趨毫無節制水大則高郵一帶堤工危險例須啟放車運等壩而小民每因稻未刈穫扶老攜幼環而乞緩情殊可憫連年防護頗費經費冬春水小則僅存二三尺鹽運船

雙欄淺多至延誤綱期資本虧折雖霜清後向山漕臣衙門飭屬越築禮河壩接蓄底水而河水消耗遲速無定速則雖築壩亦將不及猶未便先期早堵使下游民田缺水灌漑種種情形殊之兩平之策光緒十五年鹽務家商公稟請堵禮河以保鹽運經前漕臣李瀚章督率淮揚海道往勘建有節制洪湖之議擬將林家西壩暫信兩壩修復完整以便水大敢放並補築壩下東水堤以資收束再加展張福口以暢去路然後官堵禮河使湖水宜洩有制與原任督臣曾國荃兩商籌議方在飭估漕臣李瀚章即調任兩廣未及核辦移交臣松椿檢核接案卷傳訪商民疾苦致謂此項工程裨益實多上年春間臣赴江甯復與原任督臣曾國荃面商詳細妥議飭淮揚海道謝元福前赴洪湖查勘實係應辦之工前督臣曾國荃先行籌撥銀五萬兩交臣松椿早為備料並督飭淮揚海道率屬估辦復擬續籌十三萬兩存儲候撥臣松椿因工繁費鉅必須通籌全局利害方免顧此失彼之虞即於上年冬初親赴洪湖履勘形勢博諮輿論參核前議實堵原為要著但水性就下其勢迅猛驟求實堵第恐無甚把握且實堵後林家西及智信等壩俱全形喫重湖水擡高長堤石工處處告險將來歲修增費無可籌措而附近之安徽肝胎五河等縣從此不免水患流弊甚多均須預計或有議於禮河南花園嘴另開引河以備減漲者無如新開引河可暫不可久數年後必刷深與禮河同病查其地勢亦甚不宜惟勘得禮河迤西蔡家莊地方若建滾

水石壩一座定准平由尺寸使之水小能蓄水大則過較實堵實有把握且無後患但建壩用款比照成案大加刪減約計至省亦需三十餘萬兩當此度支不裕巨款實屬難籌然使畏難而止一廢百廢不惟有負商民之殷殷仰望亦非維持國計民生之道臣等愚以爲天下事大利未易遽興而有患不可不除惟有權其緩急量力辦理先修一工先收一工之效先籌一欸先裨一欸之需商民聞之知次第可以興辦冀觀厥成自必衆志歡舞庶幾上惜國帑下順民情所有應行先辦之工一曰修復三壩一曰修整東水堤一曰展挑張福口查林家西壩信壩建於道光年間智壩建於乾隆年間當先聖飭造之時費帑不知幾許廟謨宏遠深意昭然凡爲臣子自宜謹守成法曷敢稍事輕忽乃林西一壩於道光十九年敗衝損後僅施堵閉而石底殘壞石舌下漸跌深塘至二丈餘智信二壩石舌下三合土並關石橋均甚殘損智壩壩下石底亦多橋朽石陷日久不修更必傾圮廢棄湖水不得由三壩分洩則禮河終難節制是以亟須修復以資遵守其三壩以下南北東水壩築於康熙年間綿亙百餘里失修太久潰塌不堪設遇啟壩放水勢必隨處漫溢下游農田皆有澤國之患亟應將缺口擇要補築至張福口引河向分湖流又爲鹽船入運經行最要之區既欲節制湖水不使歸禮河直瀉先當大闢此途以分其勢口門尤須寬深昔年辦導淮近年辦防黃皆曾屢挑寬深惟黃水挾沙所至淤墊向無歲修之欸以頻浚之上

年冬令湖水消耗太驟鹽船擁泊其處竟至膠擱難行若不急求深浚於鹽務大有窒礙應再爲加展寬  
深俾鹽船通行無阻且盛漲分洩亦可藉以愈暢其路湖防鹽務均甚獲益尤爲目前可收實效之工臣  
秉成等會商擬由臣松榕督同道廳趁此水小尙易施工早爲趨辦大汛以前務期一律告竣計三項工  
程共約需銀不過數萬兩可以集事卽在原任督臣曾國荃先撥之五萬兩內動用辦理如有不敷臣松  
榕當仿照常年工程之案設法湊濟事竣核實造銷總期工歸實濟款無虛糜其另議於蔡家莊建設滾  
水石壩一項需款既至三十餘萬之多原任督臣曾國荃認撥十七萬除已解五萬外僅存十二萬兩尙  
不足數臣秉成自當按照原議儲備其不敷之款仍留十數萬兩非一時所能籌足應暫爲緩辦臣等容  
當另行會商或分年帶籌或續行開款再撥俟積成三十餘萬之數再行估辦至石滾壩平由僅可在五  
六尺左右方使上下游均受利益亦當於估辦時較准尺寸再行定議隨時奏明請旨辦理如此籌議  
款以緩而漸蓄事雖久而必成於國計民生皆甚有裨得旨如所請行○丙戌李鴻章奏臣欽奉光  
緒十六年十二月初九日寄諭給事中劉恩溥奏直隸吳橋縣宣惠河缺口二處積水未消下游受害  
甚鉅請飭委員履勘接築堤埝等語著李鴻章體察情形妥籌辦理等因欽此當飭天津道胡燏棻遴委  
恩補容城縣知縣俞廷獻前往逐細勘辦據該委員會同該縣勞乃宣勘得張家窪牛家屯等處鄰近三

十餘村地勢最低屢受宣惠河水患同治十一年挑濬河身加增堤岸俾利宣防其時張家窪之前牛家屯之後積水未消無從取土稍有缺口二道致未修築歷年運河漫溢水由兩缺口橫流衝出各村廬墓田禾均被淹沒與該給事中原奏情形略同若將該二處缺口堵築以後再遇水至卽由宣惠河順流而下不致旁溢該低窪各村得以保全卽下游東光等處亦不至波及爲患惟接築老堤直隸現在水未全涸取土仍艱擬略爲變通統作偃月堤形地勢稍高施工較便擬由局籌款興辦至兩岸堤身卑薄殘缺所工段過長應由縣勸諭紳民加高培厚以資抵禦由該道詳辦前來臣查吳橋縣境內宣惠河張家窪牛家屯兩處堤段既經該印委勘得實有缺口二道應卽妥籌堵合以免河流旁溢淹及田廬已飭天津道遴派委員會同該縣招集附近災民剋期堵築以工代賑由籌賑局撥款領用其兩岸堤身卑薄殘缺卽責成該縣勸諭該處紳民自行設法修辦以資捍衛報聞○戊子馬丕瑤奏據二品頂戴廣西右江道兼雲騎尉張汝桐稟稱該道前以豫省軍務肅清陳情乞養欽奉 諭旨後寄寓江北其原河南撫臣在案此時前河南候補知府李曾文有湖灘地十四頃在清河縣境內讓與該道耕種藉得薪水無缺每年除完官租食用外仍有所餘陸續又添購湖田熟地三十餘頃草地七十餘頃起有集市莊房皆頻年餘款所增置光緒二三年間豫省旱荒來就食者不下三百餘人該道均留養於湖地之內及奉委勸

辦賑又辦山東賑務凡局費火食委員川資以及書吏飯食各項均未開支賑款皆由該道之地租備辦其時豫東兩省待賑孔殷該道剴切勸諭清淮一帶士民無不踴躍輸將寒士以所得書院膏火捐助婦女則輸及釵環或銀錢或食糧絡繹而至得以從速運濟賑需大江南北共捐有五六十萬金之數均經造冊報明東豫兩撫臣在案雖該處士民天性好善而該道感其好義欲有所報刻不能忘該道奉親事畢服闋後仰荷 聖恩簡放廣西右江道歲入廉俸足養終老屬為敢請有餘資以取咎戾且田地不在本籍請將所置清河縣境內之湖田草地約共一百餘頃捐入清河山陽兩縣書院膏火並育嬰堂經費更有請者前清河督臣袁甲三助續遺愛清淮士民呈請奏建專祠奉 旨允准經該道集款購置祠內香火地畝交該處紳董經理為數無多於歲修之項未有所出擬請於此項地租內提出一成撥由該紳等支用又該道前因湖地係初招人開墾之區遠處貧民居多性情不一罔知禮義曾在莊內設立義學一堂延師教課貧民子弟束脩等項亦擬照舊於地租內開支該道所捐地畝現時價值約三萬餘千每年所收地租約三千千歷年耕管完納官租無異現以該處窮遠各佃戶五方雜處乏人照料情願捐作地方費用非敢謂急公裨益萬不敢仰邀獎敘惟懇奏明立案並分咨清河兩江督臣江蘇撫臣查照俟稟奉批准即派人前往將所有地畝契據房屋集市及各佃承種花名備造清冊就近呈繳清河督臣委



員點收撥充各費等情據此臣查核所稟出於至誠應准照辦除分咨外理合據情陳明仰懇 飭下漕

河兩江督臣及江蘇撫臣查照立案至該道張汝梅所捐地畝等項價值三萬餘千以作地方膏火等費

洵稱樂善好義可否酌予獎敘出自 聖慈得 旨張汝梅著該部核給獎敘所捐地畝卽著馬丕瑤分

咨立案○許景澄奏臣於本年正月十五日抵俄十七日接任當經奏明在案於二十日往見該外部旋

准外部照會俄皇定於二十二日接見是日臣親齎 國書前往恭遞並照例撰擬頌詞宣揚 聖意俄

皇亦以與中國和好二百餘年深願從此益加敦睦其言似出真誠謹將頌詞及俄皇問答繕單呈 覽

下所司知之○辛卯諭劉銘傳奏病仍未痊懇請開缺一摺福建臺灣巡撫劉銘傳著准其開缺並開去

幫辦海軍事務差使○壬辰剛毅奏江蘇地方濱臨湖江毗連河南山東安徽浙江四省多有販私梟匪

出沒無時滋事釀案臣於前年七月初旬跪聆 聖訓有嚴辦梟匪之 諭臣謹辭出都下懷莫名欽悚到

任以來卽嚴飭地方印官暨各營將弁認真稽察過案卽辦有犯必懲毋許稍涉寬縱一面懸賞勒拿著

名匪首盡法重辦自去秋臣派營帶撫標正前營記名總兵龍殿揚等將稔惡首犯王均恩拿獲正法之

後其餘羽翼咸知渠魁授首各自聞風解散或遠颺歛跡或改業務農亦有投營應募願充眼線以自効

者迄今數月官引頗見暢銷惟此等不法匪類所在貽患根株難淨伏莽堪虞臣仍督飭各屬員弁小心

防範加意查拿無任鬆懈致生事端以仰副 聖主除暴安民之至意報聞

東華續錄

光緒一百三

臣朱壽朋敬編

臣汪錫增恭校

夏四月甲午朔時享 太廟 上親詣行禮○乙未以邵友濂爲福建臺灣巡撫○諭巡視西城御史鳳英等奏遵保獲盜出力之司坊紳董一摺著該部議奏○予捐助賑款道員李經義俟服闋後記名簡放○李鴻章奏永定河下口一帶近年淤墊高仰以致下瀆上潰頻有漫決之患兼之衝刷鳳河往往闌入北運去秋汎漲更盛數百里間一片汪洋運道民田爲害匪淺因飭派天津道胡燏棻記名道吳廷斌會同永定河道萬培因馳赴永定河下口詳勘形勢測量高低據稟永定河下口至韓家樹寬長四五十里其中淤北河一帶悉淤成高阜流行委係不暢是以溜勢由北而東衝入鳳河而鳳河北運均有汲汲不可保之勢再四審度惟有由河身迤南鄭家樓地方挑挖引河十四里餘至南下八汛二十二號出口由楊家河匯入大清河地勢寬廣低窪作爲下口甚爲直捷暢利等語臣維水性就下治水之道宜順其性而濬通尼閘尤爲緊要永定河下口向由楊家樹左右匯入大清河在中淤北淤之間渾流經行年久逐漸淤墊愈下愈高勢如登坂以致屢經疏濬未見功效下瀆則上易潰故上游頻成漫口幾至無法挽回

又水勢直灌鳳河上年大水將鳳河身數十里淤成平陸東堤衝刷殆盡鳳河爲通州武清東安各處匯水所由遼津之路淤塞過甚則通武一帶水患難除況鳳河東堤爲通京驛路及北運河保障東堤之外地勢尤低若任渾流建瓴而下徑潰驛路闌入北運更於運道有礙若改歸南法就近山下八汛二十二號作爲下口仍會大清河趨天津之三岔河下入海門其勢甚順其二十二號以下距清河尙十餘里地勢遼闊均屬大窪荒港並無村莊本係從前下口渾水蕩漾之區得以散水勻沙卽清河不致遽成淤塞非韓家樹河道狹窄者可比恭讀乾隆十九年 高宗純皇帝諭曰方觀承奏永定河下汛堤堰漫水一摺漫口既屬堰尾又外俱空闊處所無淤塞之患似可聽其合流使下口益暢等因欽此誠以治河必權其利害輕重因地制宜查南八下汛堤工二十六里以下卽係無工處所今擬由二十二號作爲下口已屬堰尾且以外俱空闊處所聽其與清河合流既與乾隆年間 聖諭相符實於全河形勢大局深有裨益自應如該道等所議卽由鄭家樓地方挑挖引河至下八汛二十二號出口俾得就地順水性節經費以暢永定尾閘並保鳳河北運是一舉兩得之計現飭派記名道吳廷斌永定河道萬培因會同籌辦招集附近災民以工代賑尅日興工務於伏汛前蒞事再鳳河下游河道及武清天津一帶東堤經上年大水淤塞衝刷淹浸民地甚廣迄今水未全涸永定河下口既令南移則鳳河以後受害較輕必須及時疏

濬河槽培築東堤以資保衛臣現派天津紳士前廣東水師提督曾克忠會同候補道桂本誠前往勘估分投趕辦疏築事宜以上兩項需費均屬浩繁所估永定河及鳳河工費督飭司道在賑捐項下竭力籌撥事竣據實開單彙報下部知之○李鴻章奏上年順屬水災以東路之武清寶坻爲最重而武清寶坻之河患以鳳河青龍灣減河爲最重武清之鳳河因受永定河渾流衝突東堤潰決下游淤塞臣已遴派員紳挑河築堤另摺奏明在案寶坻之青龍灣爲北運減河自香河縣之王家務起經由寶坻下至寧河入海雍正八年築壩挑河以來迄今節節淤墊光緒十四年曾經挑挖一次因迫於時日限於經費所挑無多去夏霖雨兼旬河流狂漲爲數十年所未有潰堤決岸寶坻受害獨深必須大加挑修爲民捍患據候補道桂本誠會同通永道楊宗源勘得該河工上游自香河縣之王家務至寶坻之廣安橋五十餘里河身寬十餘丈至二三十丈水深五六七尺不等灘嘴決口較多必須切灘堵口俾水勢順流而下不致旁溢爲災廣安橋下至大寶莊十餘里河身漸窄漸淺且河高於地缺口十餘丈直溜孫校尉等數十村民地多爲沙壓應築越堤三十里俾可放淤耕種大寶莊以下六十餘里河槽僅寬二三丈深一二尺內有淤高並無河槽之處若不及早疏濬寬深則下雍愈高上潰愈甚修治愈難竊於運道民生大有關係惟是工繁費鉅款項難籌臣與兼尹臣府尹臣往返函商將大寶莊以下開濬培築各工咨行直隸提督

葉志超通承鎮總兵吳育仁前往酌分段落調派所部蘆臺北塘淮練各營分投興作酌給兵勇犒賞不給方價但恐工多勇少挑不足數並令添僱民夫同時分挑其大寶莊以上各工並黃莊八門城一帶殘堤潰口及大寶莊以下築堤放淤昔年所開舊濬河黃莊新河皆須挑挖寬深添建石閘均資成桂本誠等督率印委各員招集附近災民剋期興辦由順直賑撫款下分撥濬用以工代賑事竣彙入工撫案內奏報查上年調派營勇挑挖青龍灣濬河在事出力員弁奏奉 恩准給獎此次工程艱鉅數倍在事員弁櫛風沐雨胼胝泥塗洵屬異常勞苦仰懇 天恩俯准照河工程竣工竣時容臣等擇尤保獎以示鼓勵出自 慈施逾格所有籌修寶坻河工緣由理合會同兼管順天府府尹臣卞世長順天府府尹臣胡聘之合詞附片具陳伏乞 聖鑒訓示再通州境內之潮白河溫榆河平家疇順義香河境內之箭桿河薊州境內之潮運河各有挑濬堵築工程並由臣等籌款委員分投修辦以工代撫期於河流順軌民困以蘇合併陳明得 旨如所請行○丙申命徐郁承修精捷營工程○在國因奏出洋期滿之候選訓導徐學伊請以教諭選用允之○李鴻章奏北洋定遠鎮遠濟遠三艦月支公費原擬暫給定鎮兩艦各月支銀六百兩濟遠一艦月支銀四百兩前經分別奏咨聲明此項戰艦一切規模皆屬創始其名額薪餉各項斟酌損益再行隨時咨報立案嗣經統領北洋水師提督丁汝昌以該三艦船多機繁費用浩大除

原領公費外定鎮濟三艦實墊用銀七千五百餘兩當經飭據海防支應局司道詳細核議原領公費實屬不敷應自光緒十二年五月起定鎮兩艦各月加公費湘平銀一百五十兩其五月以前計自光緒十一年十月起至十二年四月止共七箇月仍照加支公費銀數按月補給計三艦共補給公費湘平折庫平銀四千三百七十餘兩在三艦備用項下撥給歸墊業經分咨查照嗣准兵部議覆以補給三艦公費未便率准應令奏明辦理等因查原定三艦公費銀兩不敷過鉅該管帶等共墊用銀七千五百餘兩除補給庫平銀四千三百七十餘兩尚賠墊三千餘兩若再令賠此鉅款力有未逮勢必就現領公費挪移補而每月應需料件轉未能照數購備勘加修整致使全船輪機器械日就銹壞且得藉口請款大修貽誤既多糜費尤甚況此次公費正因其不敷於前是以酌加於後既准加支於後自應補給於前似未便吝惜小費貽滋虧損所有補給三艦公費庫平銀四千三百七十餘兩仍請照數開支以免賠累而重利器得 旨如所請行○諭張家口監督榮安奏差滿回京齋交盈餘銀兩並請減成賠繳虧短盈餘銀兩一摺所得盈餘銀三千八百八十六兩零著交廣儲司其所請減成賠繳之處著戶部核議具奏○丁酉予故雲貴總督岑毓英於泗城府屬凌雲西隆西林建祠○李鴻章奏已革福建試用道傅廣捐助賑銀一萬兩請破格優獎得 旨傳廣著以道員選用○前山西大同鎮總兵張樹屏卒賜卹照軍營立

功後積勞病故例事蹟交國史館立傳准於山西省建祠並附祀各省淮軍昭忠祠○張煦奏臣前於光緒十六年九月內將拿獲澧州所屬地方滋事匪犯陳啟元等照章就地正法並派勇搜捕逸匪情形恭摺具奏奉 硃批知道了著卽嚴拿逸犯廖星階等務獲懲辦以靖地方欽此欽遵督飭文武員弁認真緝去後旋據幫帶振字中營留黔補用副將張德朝振字左營後哨哨官遊擊銜候補守備石起珩暨該州地方官弁陸續捕獲匪黨李衡堂魯詳美徐禹山石銅匠杜汶秀劉祖慶韓啟育彭興人李元迪李家興傅懷亨徐玉山傅道文袁世林黃雲香劉春芳袁升中談文一畢昌坤董承登袁甲計楊可儒二十二名解州審訊又據幫帶巡緝練勇五品軍功候補把總崔鵬舉拿獲匪首徐樹堂廖星階二名先後押解到省隨據澧州知州鄒立誠訊取李衡堂等並前獲之劉傳立覃東雲卽置玉恆確切供詞並經飭委署長沙府知府甯環慶將徐樹堂廖星階詳加推鞫開具供摺由臬司覆核稟請前來臣逐一查核據徐樹堂供原名徐樹寅湘陰縣人向在武陵縣石公橋篾匠手藝光緒十三年三月內聽從已獲正法之會匪龍老九在武陵縣屬良屋壩山內潛謀作亂龍老九等旋被兵勇拿獲伊逃湖北沙市一帶十五年七月回至澧州屬周家岡值廖星階等開堂放風伊復聽糾入會改名徐樹堂與已獲正法之陳啟元等輾轉糾往共邀有三百餘人推伊爲總頭目十六年七月二十八日廖星階起意滋事約定八月初四日



放火搶劫新州津市令伊先回石公橋糾人前往會合伊於八月初一日起身詎人未邀齊廖星階等已在梁家坪起手將團總杜彩珍殺死各處兵勇捕拿嚴緊伊逃至崇河縣地方被巡緝營拿獲據廖星階供澧州人光緒十三年聽從常德府人高曉峯入會充當老五伊復轉邀韓詳美等入會十六年七月二十八日因同會之馬萬伏挾團總監生杜彩珍查知入會情由聲言報官拿辦之嫌當與馬萬伏陶汶表李衡堂徐樹堂韓詳美徐禹山及已獲正法之楊恩元陳啟元均在朝天湖公同商議將杜彩珍殺死即便起事先搶新州津市進城劫獄再往常德府擄掠並令徐樹堂赴石公橋再約四五百人前來會合接應至八月初四日夜徐樹堂尚未邀人前來伊與馬萬伏等互相糾約共得二百餘人預備划船十六隻在七里湖等處藏匿隨分擄刀棍同至梁家坪杜彩珍門首馬萬伏等進內將杜彩珍拖出與杜汶秀韓啟育將其用刀砍斃伊同李衡堂等放火將杜彩珍及附近屋宇燒燬又至韓家灣粟家坪焚燒房屋七八家並搶劫衣物初六日復與陶汶表等會合共四五百人先至孟姜堤甘家灣等處放火燒燬民房二十餘家駕船前赴新州正擬放火搶掠卽有差勇前來圍捕伊與楊恩元等各執刀矛上前抗拒致傷兵差該匪黨亦被格殺三人隨各駕船逃走陳啟元等逃避不及均被拿獲初十日夜又邀集會黨至澧州城外放火意欲進城劫獄將陳啟元等救出經兵勇追捕逃散伊旋被巡緝營拿獲各等供據李衡堂韓

詳美徐萬山供認先年入會各自輾轉糾人與廖星階等商議起事同至梁家坪孟姜垸等處放火燒搶並在新州隨同拒捕石銅匠卽石盛巨供認充當津市頭目與廖星階等糾邀入會同至梁家坪馬萬伏將團總杜彩珍拖出砍斃伊亦手執鐵叉戳傷杜彩珍胸膛肚腹以後在孟姜垸等處放火伊都在場據劉祖慶供認聽從石銅匠入會隨同廖星階等赴梁家坪一帶伊僅止放火並未傷人據曾啟育李元迪供認於光緒十五年三月彭興人供認於十四年三月各自聽從廖星階滋事之時該三犯均經隨行曾啟育用刀將杜彩珍砍傷李元迪在場助勢彭興人動手放火各等供不諱核與前獲正法之陳啟元等供俱相符臣查廖星階聚眾結會因被團總監生杜彩珍查知聲言報官拿辦輒卽起意商同馬萬伏等將杜彩珍殺斃並恣意焚掠拒敵官兵形同叛逆徐樹堂卽徐樹寅先經聽從龍老九入會謀逆經前升任撫臣卞寶第拿拿未獲復敢改名入會糾人滋事實屬怙惡不悛李衡堂詳詳美徐萬山各自入會輾轉糾人俱係匪黨魁石銅匠杜汶秀劉祖慶曾啟育彭興人李元迪或隨同下手傷人或縱火焚掠或在場助勢均屬同惡相濟厥罪惟均未便久稽顯戮業經臣隨時覆核明確先後批飭查照奏定章程就地正法傳首犯事地方懸竿示眾以昭炯戒其李聚興傅懷亭徐玉山傅道文袁世林黃照香劉春芳袁升申談文一覃玉恆十名暨供各自聽從徐樹堂廖星階入會並未隨同滋事畢昌坤董承登袁申計楊

可儒劉傳立五名均供被廖星階等處逼脅傭工服役委未入會拜盟再三環質堅供不移正核辦聞據  
署澧州直隸州知州裕慶申報談文一在管患病醫治不效於十七年正月十九日病故驗訊看役人等  
並無凌虐情弊應卽擬結查例載異姓結拜弟兄年少居首並非依齒序列聚眾至四十人以上者爲從  
發雲貴兩廣極邊煙瘴充軍又洋盜案內在船爲匪服役杖一百徒三年又湖南省搶竊匪徒罪應擬徒  
之犯毋庸解配在籍鎖帶鐵桿石墩五年又例載斷罪無正條援引他例比附定擬各等語此案該犯李  
家興等聽從結拜弟兄均至四十人以上並非依齒序列實屬爲從自應照例商擬除談文一業經病故  
李家興傅懷亭徐玉山傅道文袁世林黃豐香劉春芳袁升中覃東雲卽覃玉恆均合依異姓結拜弟兄  
年少居首並非依齒序列聚眾至四十人以上者爲從發雲貴兩廣極邊煙瘴充軍例擬發雲貴兩廣極  
邊煙瘴充軍仍以極邊足四千里爲限均於左面刺拜盟匪犯右面刺煙瘴改發各四字分別配定地方  
折責安置畢昌坤董承登袁申計楊可儒劉傳立均訊未入會拜盟惟與會匪熟識往來被脅傭工服役  
亦應比例問擬畢昌坤董承登袁申計楊可儒劉傳立均比依洋盜案內被脅在船爲匪服役例各擬杖  
一百徒三年並請比照湖南省搶竊等項匪徒罪應擬徒之犯毋庸解配在籍鎖帶鐵桿石墩五年例各  
於澧州原籍鎖帶鐵桿石墩五年限滿折責交保領回管束除仍飭地方官及營汛員弁督率差役兵勇

嚴拿逸犯馬萬伏等務獲究辦以淨根株外其被焚房屋已由該州捐資撫恤不至失所現在地方一律安靜堪以上慰 聖懷所有首先拿獲匪目劉顯澤等九名及匪黨徐玉山等二名並格殺匪徒三名之幫帶振字中營留黔補用副將張德朝首先拿獲匪目楊恩元等五名並匪黨李家興一名又協同張德朝拿獲匪目李衡堂之振字左營後哨哨官游擊銜候補守備石起珏首先拿獲匪首徐樹堂廖星階之營帶巡緝營練勇五品軍功儘先候補把總崔鵬舉均屬著有微勞合無仰懇 天恩勅部照例核給獎敘該總監生杜彩珍因查拿會匪被戕殞命事屬因公殊堪憫惻可否 勅部照例議卹出自 鴻施其餘在事出力員弁勇丁由 臣酌量核給外獎以示區別下部議奏○張曜奏准工部咨議擬山東省請撥光緒十七年防汛經費仍令動支額定銀四十萬兩等因光緒十七年二月三十日具奏本日奉 旨依議欽此恭錄咨行欽遵到 臣伏思光緒十二年以前山東河身尚未盡淤額定防汛經費四十萬兩桃汛之時已多漫溢迨鄭工失事河流頓涸水去沙停全河淤墊水高於岸障堵全賴隄埝而保護隄埝又賴埝端以致工程之多倍於往昔十五十六等年 臣不得已於額定經費之外懇請添撥部議添撥銀二十萬兩為備料搶險之用均蒙 天恩俯准第連年夏雨時行伏汛較大搶險工料仍多不敷所有本年防汛 臣委各總辦分段防守經費亦分段估計核實奏請即部 臣原奏內稱黃流湍悍異常情形難於逆料

若必拘定額款恐致貽誤要工等語則是部臣亦已深悉其難乃上年添有備料之款尙屬不敷本年若僅照原定之額豈能足用臣受恩深重手足胼胝固臣力所應爲裁節糜費亦臣職所當盡惟款項所短太鉅實屬貽誤堪虞卽如豫省河工防汛經費前河臣譚廷襄原定每年止二十萬兩嗣因不敷工用歷任河臣曾國荃等先後請增至五大十萬兩防河官兵餉項尙不在內今山東河道過長河身過窄防守至難未敢稍涉遷就惟有仰懇天恩飭部查照臣前奏迅再核議撥款以濟要需轉瞬伏汛將臨臣不勝激切之至得旨該部速議具奏○己亥予捐助順直賑通永鎮總兵吳育仁三代從一品封典○李鴻章奏查延慶州之居庸關爲太行九險之一逼近京畿巖巖峭壁跬步皆危前代恃此備邊在其險巖我朝幅輿遼闊中外一家內外蒙古藩王貢使來往京城及西北兩路邊防台站轉運軍需必皆取道於此二百數十年來從未大加修治關溝四十五里穿山度峽夏秋水石交衝行人病涉冬間谿澗溝坎凝結成冰人畜每多顛仆商旅視爲畏途亟須設法興修俾臻平坦惟工程繁鉅需款甚多直隸向爲缺額之區公款無可籌撥光緒十三年四月間原任宣化府知府章洪鈞督同前任延慶州知州章成義懷來縣知縣何承緒詳詢紳耆博訪輿論僉謂捐收過往牲畜贖資修道衆商無不樂輸擬於居庸關設立公所分別駝驢牛馬驢頭猪羊每隻酌捐制錢十文至二三文不等無分中外一概計數抽捐集商

民不費之資興地方承賴之利事屬輕而易舉其差馬回空婦女空騎與夫農具柴草駝載概不收捐以示區別選派該處公正紳士李厚基等董司其事議定章程稟經臣批准試辦該州等履勘關溝自岔道東撥子起至昌平州交界之狼窩止統長六千七百三十丈估計土石各工所費甚鉅牲捐零星湊集未能徧行修墊爰分十一段次第平治將最險之八達嶺等處首先開工適有延慶州人湖北候補道胡鏞請假回籍臣因其熟悉關溝情形飭令會同該州等妥爲商辦於是溝道漸平車輛過往日多稟遵仿照牲捐抽收俾得一律修治該官紳等審察形勢疏鑿兼施築壩挖溝填凹平凸或買民田繞越或用山道通行所開道段寬四五丈及一二丈不等遂段修築坦平車馬馳驅已無險阻若求經久之策尙非巨帑之期每遇大雨時行山水建瓴而下掀天揭地數萬之石若盤走珠溝道頓成深坎豁徑爲之不迫必須審其受患之處與所以趨避之方辦理始有把握上年夏間霖霖浹旬豁流暴發爲數十年所未有原修道段如八達嶺素稱天險雖經此次狂瀾依然鞏固餘處稍有衝損修復尙易爲功惟彈琴峽石佛寺二處兩山逼峙水無所洩壩道各工半就傾圮欲圖補救則限於地勢非人力所能爲因擬改道西山繞出彈琴峽石佛寺由六郎影仍歸中道舍水渠而行山徑開土田而避石路庶無衝潰之虞當飭照議趕辦據報於本年二月十八日一律工竣飭委宣化府知府汪守正驗明道段堅平實於南北行旅大有裨益

然工程無歷久而不做通溝道路經車馬之蹂躪風雨之摧殘非籌有歲修大修專款誠恐數年來辛苦籌辦之工仍歸廢棄所有牲畜捐款自光緒十三年六月初四日起至本年正月底止計共抽收制錢二萬九千一百六十餘串士商捐助銀六百餘兩支銷公費以外僅存制錢三千五百串銀六百兩斷不敷用應將牲捐酌留數年除隨時修補動用外湊足銀一萬兩即行停止車捐起於道工俟牲捐停收仍應專留大車捐數年湊足銀五千兩亦即停止以上兩項捐款分別發商生惠牲捐恩銀專作歲修經費車捐恩銀專作大修經費明定規條或成官紳互相稽察以杜侵蝕虧挪之弊此後經理得宜道工日臻穩固數十年內必可無虞險阻共樂湯平矣在事紳董自備資斧一塵不染任勞任怨力爲其難苦志經營五易寒暑遂使馬不容足之關溝化爲車載暢行之坦道殊屬著有成勞洵堪嘉尙自應擇尤保獎以昭激勸出自 鴻慈迴格再修辦溝道工費係由地方紳商零星捐集續湊平治實用實支不動官款請免造冊報銷得 旨如所請行○庚子以捐募順直賑款湖北布政使王之春頭品頂戴○以捐助山東賑予前廣東高廉道陸心源開復原官交吏部帶領引見○壬寅劉秉璋奏紳民捐輸銀兩請加廣文武鄉試中額下禮部議奏○沈秉成奏南洋各號兵輪船前經海軍衙門定章每年於春分前後赴北洋會操秋分後回防前督臣曾國荃以總統李成謀有長江水師之任未能遠離職守派委總兵吳安以作爲統

領兼帶寶泰兵輪黃成將應辦事宜實力整頓分別奏咨在案現在記名提督前安徽壽春鎮總兵郭寶昌接充總統應令親率出洋講求操練期收實際前設統領名目應卽裁撤查北洋海軍定為經制南洋船隻應調會操視如一律則軍制亦應參酌釐訂所有南洋可供海戰之大船現擬分設左右翼各派翼長一員查有提督袁九皋堪委左翼翼長統帶南琛鏡清保民三船並兼帶南琛一船總兵吳安康堪委右翼翼長統帶寶泰開濟南瑞三船並兼帶寶泰一船依次分號行列昭明與其餘各船均聽總統節制調遣以一事權總統出洋所坐之船卽以該管帶官為中軍料理一切袁九皋吳安康各又有管帶薪水毋庸另給惟翼長費用較增擬將裁出統領公費移給兩翼長均分支領以資辦公如此一改移間分合進止指臂相連於操巡可則得力而於薪費無所增減下所司知之○貴恆許應鑒奏光緒十七年二月二十八日奉 上諭給事中洪良品奏倉臣侵欺廢弛請飭查辦並條陳整頓倉務事宜各摺片著派貴恆許應鑒會同戶部確查覆奏欽此旋由內閣鈔錄原奏等公同閱看該給事中所參倉場侍郎興廉游百川各款列舉欺飾包庇縱弛侵冒四端而復以考究各倉米石為請事關倉政廢壞亟應悉心查核當卽遴派司員檢齊案據並向倉場衙門查查各項事宜調取卷宗嗣於三月十七日始據該侍郎等逐款詳覆並將各項卷宗及監督花戶等印甘各結咨送前來臣等按照原參各款詳細推求如原奏內稱



該給事中查祿米倉時見倉門不開偷漏甚多請飭認真整頓該侍郎並不實心經理去歲查驗虧米十六萬石之多一節查祿米倉米石虧短該侍郎固有失察之咎惟此案既經刑部將該倉花戶人等審明治罪並將該侍郎請旨交部議處復由戶部查照成案按成實令分賠案經奏結已無應查之處又原參內稱該給事中查北新倉時見市僧數十人不持領票來倉偷運移文令將花戶交城嚴訊該侍郎反代爲飾辯云並無其事一節查光緒十四年六月間該給事中曾將此事奏請查辦並移會倉場檢閱倉場移覆該給事中文內未見有並無其事之語惟覆奏摺內聲明兵丁由米房支食以領米抵償鋪商到倉尋覓兵丁事或有之等因原參所謂代爲飾辯或卽指此第此事業經該侍郎嚴飭該倉監督查明詳覆並派員密查尙非置之不問當時既未查出花戶與商人勾串夾帶實在確據現在亦無從追究又原參內稱各倉監督近來並不駐守官廳另擇僻靜之地棲止該侍郎聽其自便並不嚴加約束一節查監督專司倉務理應在倉駐守認真防範當經咨查倉場去後旋據該侍郎等覆稱滿漢監督二員均按五日一班輪班值宿遵照章章在附近處所住宿並未另擇僻靜之地棲止等語臣等復於查看工程時面詢該監督等敘稱近來均係輪班值宿與該侍郎等所言相同似尙可信仍請飭下該侍郎等實力稽查此後該監督等如有曠誤隨時參處以儆玩泄以上所參欺飾包庇縱弛三端均可毋庸擬議惟原

奏內稱倒塌廩座所剩木植磚瓦歸併拆修尙堪敷用該侍郎扣存部庫銀內聲明三四年後各倉廩座一律修完乃閱時已及四年用銀八萬四千餘兩而冊報修整之廩祇有興平南新舊太平儲濟六倉且據倉犯供招仍有勒令花戶自行苦補之說而所扣部款不知作何開銷一節歷年案卷雖有可憑而工程是否修齊情形必須察看等隨於三月二十三二十五等日帶同司員親往興平南新舊太平富新太平儲濟六倉周歷閱看新修各廩復會同細心綜核查各倉工程向俱歸工部查照定例辦理自光緒元年原任侍郎延煦等奏請照民間辦法由該衙門自行籌款興修原係爲節省浮費起見其時修理一百七十九廩用銀四萬九千九百餘兩每間僅合銀十八兩有奇迨十三年該侍郎等奏明每年由歸還戶部五萬兩內扣存二萬兩作爲修廩之用如有不敷由通庫籌補迄今四年之久所修僅止六倉已與原奏所云三四年後各倉次第修整者不相符合且該侍郎等因各倉應修者有百數十廩故於原奏內聲明擇情形次重者先行興修是所修並無情形極重之處乃新修四十六廩以銀數每間攤算約合一百兩有奇比較元年成案多至五六倍卽謂今昔情形不同修廩一間需費總在百金以外何以儲濟一倉每間合銀二百數十兩竟至十數倍之多又儲濟倉之益字周字景字三廩冊報添換大木有七成八成九成之不同而動支銀數分毫無異是其任聽商人含糊開報並不悉心稽核現經查看已修各

版庫間數尚與冊報相符而太平之仁字版興平之致字版新修之後復有坍塌滲漏情形可見當日修理未必工堅料實該給事中所指侵冒不為無因特是此項工程從前既未查估情形輕重不能懸揣究竟有無浮冒已屬無從核算現在提訊花戶人等供稱版庫小有滲漏用錢無多者每遇大雨時行呈報不及花戶自行捐資修葺係為保護米石起見尚非倉場勒令苦補所扣部款經戶部疊經駁飭由該侍郎等於本年二月間自行奏請照數開銷業經奉 旨允在案所有太平興平二倉已修版庫坍塌滲漏之處亦據承修之商人供稱情願賠修取其甘結當即咨行倉場飭令趕緊修理工竣知照戶部驗收此後應修工程若仍漫無稽考竊恐帑項虛糜應請 飭下該侍郎等遵照本年戶部奏定新章先行咨報戶部查驗確實再行勘估興工其有應行變通之處仍由戶部酌核辦理臣等竊維倉場積弊甚深如果認真經理自可日有起色今該侍郎等總司倉政歷年已久祿米虧空則事前未能覺察順屬賑米則開放不免攙和卽如修版一事工程既不能一律堅實奏報亦涉含混又此次查勘各倉見有未修之版版頂坍塌米石露積詢之監督等稱係去年大雨後續行坍塌業已呈報倉場乃該侍郎等並未查明據實具奏設法收儲一任風雨狼籍日久霉變是一切倉政該侍郎等未能實力整頓咎無可辭應如何量予懲處伏候 聖裁至於米石虛實現據倉場將祿米等十三倉實存米數分晰開報飭令花戶出具並

無虧短如虛甘認重罪甘結由監督加具印結齎送存卷雖經司員逐款核對大致尙無短少然係按冊而稽臣等亦不敢遽以爲可信惟倉存米數非澈底盤查不能水落石出而去歲盤查祿米一倉月餘始行竣事現在未盤者尙有十二倉如欲一律盤查事須經年費無從出祇有分年分倉以放代盤之法較爲簡而易行請由戶部每年拈定二三倉儘數札放按年接續辦理以放代盤數年之後各倉虛實無不立見且花戶人等知有此法庶幾意存戒懼不敢任意舞弊所有詳細章程應由戶部通盤籌畫妥擬辦理又奏該給事中附片所陳除弊各條謹分別准駁恭呈 御覽一原奏內稱近來監督到倉每收花戶規費實有明知故縱情弊倉場侍郎意在彌縫一惟監督之言是聽彼既得所徇庇亦何所憚而不爲哉制之之法請嗣後御史參出倉弊先將監督撤任另派大臣查辦等語查各倉弊實御史本應查參既經查參則如何查辦自應候 旨施行該給事中所稱先將監督撤任及另派大臣查辦之處事多窒礙應請毋庸置議一原奏內稱花戶伎倆惟在盜米出售乃倉門既無關鎖花戶任其出入於是私設米局運銷無忌復有無賴棍徒乘其運出倉門徑行搶劫花戶被其禁制不得不以賄免或卽引爲身後辦事之人謂之喫倉制之之術惟有每倉派令花戶分廠承領不獨易於盤驗抑且責有專歸等語查花戶之無弊不作喫倉之狼狽爲奸誠如該給事中所奏惟倉廠承領則此廠有弊彼廠卽袖手旁觀一人在逃而

餘人仍晏然無事辦理亦多窒礙臣等參酌舊制擬用連環互保之法凡一倉承充花戶必令各倉花戶出具切結如有情弊著落出結之花戶一體分賠似此互相牽制虧短脫逃諸弊庶可稍戢一原奏內稱各倉廩門大半破壞甚至無門者有之皆不慎加封鎖請飭下倉臣將廩庫門戶修理堅完必以大鐵鎖固再令御史嚴密加封如有揭破紙迹亦將花戶懲辦等語查倉廩門鎖定例通倉由倉場侍郎封識御史加封京倉由御史封識立法本甚嚴密近來竟有廩中滿儲米石而門槌俱無者實屬漫無防檢應請飭下倉臣查明各倉廩庫凡門戶脫落者一律修理完固外用大木直樞加以大鐵鎖固查照舊例分別加封如有揭破紙迹立將花戶交部懲辦一原奏內稱向例收米必報御史查驗米色乃臣查祿米倉時花戶必於收米完竣後始行來報臣言之再三不應遽臨收米時花戶或勾通車戶將米運入私局而經紀車戶亦乘機以發水之米交倉搪抵濕米入倉全倉爲之蒸變其弊實由於此監督固之不問侍郎更所不知請於收放米石時花戶不先期報聞或別有舞弊之處許令御史將花戶徑交刑部訊辦則花戶有所畏懼等語查新米入倉查倉御史例應查核若不先期報知則米色之純雜米數之多寡何由而知嗣後新糧進倉擬令該倉監督先期三日備文知照查倉御史該御史赴倉會同監督驗收方准分廩存儲如不候御史到倉率將低潮之米收入者查出立將花戶送部治罪如業經報明該御史並不親

身到倉驗收亦准倉場咨明都察院辦理一原奏內稱臣三次巡倉深愧涓埃未報原願得一憂國如家之人與之和衷益剔但恐呼應不靈終至隔閡貽誤其應如何咨行抑或稍假便宜之處還求 恩旨裁定等語查例載凡御史稽查所及行知倉場侍郎倉場侍郎不及時妥辦者指實具奏等語是御史奉派查倉責任甚重儻御史查出弊端倉場侍郎有心迴護並不認真妥辦該御史例准據實糾參又何至呼應不靈無法救弊嗣後應仍循舊例辦理該給事中所請稍假便宜之處應請毋庸置議至原奏所稱去歲順直水災 皇上諭發京倉賑濟每開一倉米多微變不可食一節臣等伏查去歲順直水災 欽派大員於六門六鎮分設粥廠賑濟飢民又 諭發京倉米石撥給順天各屬俾資接濟經戶部行令倉場選擇乾潔好米開放旋據順天府咨各門鎮粥廠所領粟米不堪煮食又良鄉縣紳士赴倉領取粳秈米石率多紅朽復經戶部行文倉場令其懷遵 諭旨開放乾潔之米毋任花戶舞弊等因各在案是該給事中所以奏米多微變實非無因天庾米石理應加謹收儲豈可漫不經心任令紅朽應請 飭下倉場侍郎切實嚴查督飭各倉監督認真挑瞭以後開放各項米石如有以微變之米攙和者一經發覺即將該花戶從重治罪並將該倉監督照例議處以肅倉政 上諭前據給事中洪良品奏倉臣侵欺廢弛請飭查辦並條陳整頓倉務事宜當派貴懷許應騷會同戶部查奏茲據查明覆奏此案原參欺飾包庇縱弛

各節或業經奏結或查無實據卽著毋庸置議惟該侍郎等總司倉政歷年已久於花戶虧空攔扣等弊未能覺察修厥工程既不堅實奏報亦多含混各倉呈報續坍塌座並未查明具奏設法收儲是該侍郎於一切倉務均未能實心整頓咎無可辭興廉游百川均著交部嚴加議處至摺單內所擬整頓倉務各事宜均依議行○癸卯馬丕瑤奏檇縣東鄉石橋墟火災得 旨知道了卽著飭屬妥爲撫卹毋任失所○馬丕瑤奏請將不肯移交防營之補用參將張朝貴革職得 旨如所請行○諭京師自入春以來疊次得雨農田滋潤惟立夏後尙未續霽渥澤時或濃雲密布旋即因風開霽連日風力較猛深恐禾稼受傷尙祈彌殷匪系朕於本月十三日親詣 大高殿拈香並親詣 宣仁廟拈香虔申祈禱以迓和甘○馬丕瑤奏光緒十五年十一月准會典館咨具奏詳陳圖畫事宜並催各省速解志書冊籍以備采輯一摺行文廣西遵照奏限一年測繪省圖府廳州縣圖各一分附說解送到館等因當經行司照刊會典館所頒開方圖式註說通飭各屬遵辦一面遴派熟悉地理員紳前往會同查考測繪無如邊省地方究心地理兼精測繪者實不易得卽訪有一二稍通測繪之人又因沿邊疆界緊要派往繪畫勢難兼顧且各屬志書前於咸豐年間燬於兵燹未能修復毫無依據概須逐一詳勘查繪雖有繪送到司之處未敢以爲確切無訛卽呈送之州縣亦聲明無諳習之人仍請派員撥勘邊地崎嶇遼闊每一州縣非兼旬匪

月未能踏勘周妥又不敢稍事率忽驟難竣事據司呈請具奏展限前來臣覆查無異相應懇 恩俯准飭知會典館展限年餘俾得詳細查考測繪以昭慎重臣仍隨時督催不得因展寬期限遂事遷延得旨如所請行○馬丕瑤奏廣西省城學臣衙署右偏有祀元忠臣額爾吉訥舊訛爲也兒吉尼之廟祈禱禱雨靈應昭彰每歲二月二十六日誕期紳民致祭香火甲於諸祠向惟學臣抵任詣廟拈香未列祀典今學臣黃煦與臣詳考史及志乘查至正二十三年三月立廣西行中書省以廉訪額爾吉訥爲平章政事時紅巾擾湖南嶺表震動建議築城額爾吉訥捐俸買鹽歲息倍萬經費取給遂築城以石廣袤三千七百丈周十餘里環山帶水屹若金湯後得資爲桂垣根本重地又慨學宮不治捐俸庀材門櫺星樹垣墉孔殿奎閣尊經講堂齋舍咸以次舉民知向學洋洋濟濟有鄒魯風志稱桂林禮教之興實基於此至其賑火災食飢民規舜廟造陽橋修靈渠息奸貪以舒民困節浮費以裕軍儲善政不勝枚舉以故能得衆心驍將材士樂爲驅策扼羣雄之俶擾奠千里之生靈粵民賴其保障二十餘年明洪武初遣楊璘進兵靜江決西濠水築堤五道薄城猛攻額爾吉訥嬰城固守兩月不下明將既取梧潯鬱林會師省垣平章猶以忠義激勵將士誓同死守城破被執械送金陵不屈而死昔明祖稱王保保爲奇男子以其不可得而臣額爾吉訥抗節與保保同學術政績過之特以儆在南荒聲揚不遠勝朝又多忌諱民間稱爲黑



神祠乾隆年間學臣許道基乃正名曰平章廟臣忝任是邦有表揚風化之責考祭法法施於民則祀以死勤事則祀以勞定國則祀能禦大災捍大患則祀欽惟我朝褒忠表節彰闡靡遺凡民間忠孝節義一經臣工上達無不恩予表揚至前明殉難諸臣均蒙列聖賜諡予祭曠典尤爲獨超千古今查額爾吉訥晉政宜民遺愛在粵有合於祭法之義而其捐軀大節史乘昭垂更宜上宣朝廷德意下慰忠義幽魂合無仰懇天恩俯准元臣額爾吉訥平章廟列入廣西祀典由地方官春秋致祭以發潛德而闡幽光其請附祀之右丞鄧祖勝都事陳瑜趙元龍千戶曾尙賓劉永錫皆同時城破殉節可否一併仍前附祀之處伏候聖裁下禮部議奏○馬丕瑤奏查唐臣柳宗元元和間爲柳州刺史修孔子廟堂振興文教遠近從化俾民知禮義孝嫁娶葬送皆有條法文物昌明實開粵西風氣且設法贖傭婢猶俗丕變生爲賢良沒昭靈應民爲建羅池廟黃蕉丹荔歲薦馨香後有劉黃應賢良方正科以對策極言直諫出爲柳州司戶勸於民事出郊勸農沒於馬平縣都符村柳人歲時致祭其墓並祀於柳侯祠左宋臣趙抃慶曆中通判宜州今慶遠府治威傳鐵面惠及獄囚爲政簡易琴鶴自隨焚香告天飛蝗墮水教士惠民爲是郡名宦冠又黃庭堅宋宣和時爲譏謔擄陷羈管宣州傲居戍樓講學不倦士多樂從經其造就品學皆可觀蘇軾稱其環偉之文妙絕當世孝友之行追配古人沒後旅殯歸里宣人乞留衣冠

葬城西且尙象以祀此前代之有功德於民者我 朝定鼎吏治維新已故兩江督臣于成龍於順治十八年任羅城知縣大兵之後與民休息編保甲除盜賊革火耗減鹽引椎髻搔痒皆爲感格訓農課士禮教咸興秩滿超遷歷官皆著政聲論者謂其堅苦卓絕獨爲其難後之勳猷實基於此民於羅城立廟祀之以上均據各屬紳耆稟呈自行籌資修建專祠並請列入祀典該管知府詳由藩臬兩司核明詳請具奏前來臣查該紳民等數百年後猶觀感於忠孝文章僻遠蠻荒尙追慕夫徇良政教表揚前哲卽以鼓勵時賢詳稽志乘輿論悉符合無仰懇 天恩將唐臣柳宗元劉黃宋臣趙抃黃庭堅暨已故升任兩江督臣前羅城知縣于成龍等於柳州慶遠兩府由紳民籌資建立專祠令地方官春秋致祭以示 褒獎實出 隆施迺格下禮部議奏○乙巳沈秉成奏江北河運出力人員請獎下部議奏○于前護巴里坤領隊大臣金貴等優卹○諭裕祿奏查勘 永陵寶頂等處暨 永陵明堂前泊岸各處請擇吉興修各一摺著欽天監於本年五月內選擇吉期先行知照卽著盛京將軍會同工部侍郎屆期敬謹興修餘著照所議辦理○丙午 上諭 大高殿 宣仁廟祈雨○丁未吏部奏內閣鈔出光緒十七年四月初九日奉 上諭前據給事中洪良品奏倉臣侵欺廢弛請飭查辦並條陳整頓各事宜當派員恆許應駟會同戶部查奏茲據查明覆奏此案原參欺飾包庇縱弛各節或業經奏結或查無實據卽著毋庸置議惟

該侍郎等總司倉政歷年已久於花戶虧空攬和等弊未能覺察修厥工程既不堅實奏報亦涉含混各倉呈報續塌厥座並未查明具奏設法收儲是該侍郎等於一切倉務均未能實力整頓咎無可辭興廉游百川均著交部嚴加議處至攬單內所擬整頓倉務各事宜均依議行欽此欽遵鈔出到部查定刑官員溺職者革職私罪等語此案倉場侍郎等總司倉政歷年已久於花戶虧空攬和等弊未能覺察修厥工程既不堅實奏報亦涉含混各倉呈報續塌厥座並未查明具奏設法收儲是該侍郎等於一切倉務均未能實力整頓咎無可辭欽奉 諭旨興廉游百川均著交部嚴加議處等因應請將倉場侍郎興廉游百川均照溺職革職私罪例議以革職該侍郎等係交部嚴加議處惟臣部處分例止革職無可再加所有臣等遵 旨嚴議緣由理合恭摺具奏 上諭吏部奏遵旨嚴議處分一摺倉場侍郎興廉游百川均著照部議即行革職○以祥麟許應麟為倉場侍郎○以鳳鳴為正藍旗蒙古副都統○王會英奏奉 命稽查太平倉事務忽於本月十二日據本倉監督明煜署監督杜庭璋呈報本月十一日夜間丑時輪應監督明煜在倉值班玉字厥突然火起花戶更夫並該管營汛及東城坎濟水會紳值到倉搶救即時撲滅只將玉字厥並毗連之盛字厥均延燒落架該監督等嚴飭值班人役據報是夜四更時候玉字厥連南城上有人窺伺意在盜米趕往捕拿之際忽見放空之玉字厥後火起當即折回適風猛火烈

以致延燒僅將毗連之盈字廩內米石竭力搶出至所搶米石俟歸併時再行掣量等情呈報前來臣聞之不勝駭異當卽赴倉察驗餘火甫經撲滅而米石被焚多寡尙難懸揣查倉儲重地例應該監督輪班住宿十一日監督明煜是否確係住倉況前日曾有拿獲盜米人犯等情應如何督同花戶等加意嚴防方免貽誤何以十一日夜間又有一人在城上竊伺遂至火延廩座該監督所司何事當此整頓倉務之際斷難稍事姑容臣職司稽察不得不據實糾參除將該花戶先行交坊看管外該監督職司典守實屬咎無可辭應否交部議處之處伏候 聖裁 上諭稽查太平倉御史王會英奏倉廩不戒於火據實奏聞一摺據稱本月十一日夜間太平倉玉字廩突然火起延燒盈字廩當卽撲滅業將花戶交坊看管請飭懲辦並監督應否交部議處請旨辦理等語現當整頓倉務之際太平倉突然火起焚燒廩座其中顯有情弊亟應澈底根究以期水落石出所有該倉花戶人等卽著交刑部嚴行審訊務得確情按律懲辦監督明煜杜廷璵著先行交部分別議處○戊申予督解甘肅新餉希元裕祿奎斌各加一級紀錄二次○己酉漕鹽請開去差使允之賞食半俸○諭譚鍾麟著以尙書銜補授吏部左侍郎○兩○李鴻章奏請將積勞病故副將蔣勝林等優卹下兵部議奏○庚戌命麟書翁同龢敬信張蔭桓爲抖擻實錄大臣○予故江蘇按察使應寶時於上海縣建祠列入祀典○豁蒙化等屬被災田糧○豁原緩楚雄縣田糧

○辛亥劉秉璋奏臣於本年二月十八日接據建昌鎮劉士奇甯遠府唐承烈會稟正月杪傳聞雲南元謀縣知縣何炳堉被匪戕斃及祿勸縣知縣周祖廣之谷屬全行遇害當派弁勇往探旋據署會理州知州文芳具稟探得祿勸元謀兩縣會匪盤踞山上搶殺擄提該兩縣處處與州接壤僅隔金沙一江深恐軍川爲患復據弁勇探回核與州稟無異查該匪等戕官糾黨逼近會理一經滇省剿辦萬一搶渡軍川句結邊夷肆擾勢必蔓延請調兩營赴滇以資防禦等情臣查川中防營分佈各處均關緊要無可抽調且距建昌爲遠緩不濟事當經批飭該鎮等暫行募勇一營協同兵團分駐要隘毋令竄入並令司局籌撥餉銀軍械解赴建昌道收儲俾得隨時就近支領應用一俟滇匪盪平所募之營卽行遣散以節餉需得旨此案前經王文韶等奏現已諭令該督協拿逸匪卽著迅速搜捕毋留餘孽○壬子張曜奏委藩司福潤會督籌辦河防報聞○張曜奏青州海岱書院落成節欵生息作爲駐防旗生膏火下部知之○癸丑張之洞奏湖北賑捐請展限半年九之○予托克湍病假兩月○諭前經降旨修葺頤和園恭備慈禧端佑康頤昭豫莊誠壽恭欽獻皇太后慈輿臨幸現在工程將次就竣欽奉慈禧諭於四月二十八日幸頤和園卽於是日駐蹕越日還宮從此慈駕往來游豫頤養沖和數十年宵旰勤勞稍資休息懋懷實深慶慰所有一切應行事宜著各該衙門敬謹預備○諭軍機大臣等本月二十八日慈禧端

佑康頤昭豫莊誠壽恭欽獻皇太后駐蹕頤和園朕是日先往祇候跪接王公百官均穿蟒袍補褂於三座門外跪接朕於是日仍還齋齋齋五月初一日 皇太后由頤和園還西苑王公百官仍穿蟒袍補褂於三座門外跪接○甲寅 上復詣 大高殿祈雨○以福建船政總巡已革總兵王政道校巡出力賞還頂戴○卞寶第奏閩廠協造粵省廣內窩甲船於三月初三日下午水下所司知之○卞寶第奏福建鹽大使一班請暫停分發下吏部議奏○乙卯予年屆百齡五世同堂之福建惠安縣壽婦劉氏旌表並賞銀段○丙辰沈秉成奏銷江浙賑捐收支並請獎出力人員得 旨著准其酌保數員毋許冒濫該部知道單併發○沙克都林扎布魁福奏奴才等前因科布多戍守屯田緣營官兵五年班滿請將屯田官兵十員照數更換其馬步兵二百二十四名此次應由直隸宣化鎮山西大同鎮各更換一半懇請留駐一班俟下屆再行更換等因具奏奉 硃批仍著照例更換不得輕改著欽此仰見 聖主慎重邊防無微不至跪讀之下不勝欽佩悚惶之至奴才等亟應恪遵仍請更換何敢再行瀆陳致煩 聖聽惟奴才等仰荷 聖恩昇以邊疆重寄但使管見所及終不敢不據實陳於 君父者為兵計為餉計實為邊事計也奴才等伏查科布多自光緒十二年規復舊制其外調各項兵丁均已悉數裁撤現在僅有額設綠營換防屯田兵二百二十四名此班之兵尙屬整齊從中委無老弱其諳練兵情熟習屯務者頗不乏人每

派要差尙稱得力前經奴才等奏請每屆換班時擇尤酌保一次以昭激勵仰蒙 恩准該兵等感激鴻慈欣豫已均樂効力邊事益加踴躍現當整頓邊務之時其操防屯田巡邏偵探並三部院充當書識經手案卷以及隨同差遣辦理蒙哈爭訟凡一切要差在在均需熟手而新換者一時不能熟悉地方通曉蒙語實不如熟手得力且每五年換一班離疆萬里沙漠長途往返總計一年之久始能互為更替其應由直隸山西科布多例支各項統計需銀數千兩之多為數亦頗浩繁且大兵往返籌備駝馬亦甚匪易值此時事多艱如暫緩更換一班不惟省多少兵力餉力實於邊務大有裨益案查光緒十四年間前烏里雅蘇臺將軍杜嘎爾等請將綠營換防官兵變通更換官員選留數員馬步兵二百四十名全行留駐等因具奏奉 旨允准在案奴才等莅任數載於茲深知有裨邊務從中毫無關礙雖維至再不敢因原奏未蒙 俞允隨案緘默惟將一切詳細下情上達 宸聰籲懇 天恩可否俯准照案將此項戍守屯田兵一百一十二名暫緩更換一班以資熟手而裨邊務俟下屆更換之期再行奏請更換以符定制其官員照數全行更換出自 逾格鴻施下兵部議奏○戊午英廉奏查竣湯泉等處 行宮請飭交總管內務府委員擇要修理下所司議奏○許景澄奏查俄國全境東西相距絕遠西境鐵路縱橫四達皆以釐都莫斯科為輻輳之地森比得堡新都在其西北火車一晝夜可至烏拉嶺在其正東為歐羅巴

亞細亞兩洲分界處自嶺以東至於東海俄人分爲東西悉畢爾都直中國東三省外蒙古科布多之北  
袤廣萬餘里陸行艱遠俄人久議接造鐵路東至海參崴以便郵傳路長費鉅迄無成說前十年以來東  
境之路亦遞有增益此次在洋時其路已由莫斯科通至烏發省城又稍北闢一路自撒爾穆省城至  
求綿城蓋已度烏拉嶺而至西悉畢爾境近又自烏發接至茲拉托城於光緒十年造竣此東境鐵路已  
成之情形也現在議造之路擬有二道其一由烏發之路一軌直接通至海參崴計增築七千四百九十  
俄里自莫斯科起行十五晝夜可至估費俄銀三萬四千一百萬盧布其一水陸遞接由求綿之路循舊  
行水程至托穆斯克省城築路而東中經黑龍江水程以達海參崴計增築四千三百五十五俄里自莫  
斯科起行三十晝夜可至估費二萬一千八百萬盧布去年所司分別測繪以候抉擇此東境鐵路勘定  
未造之情形也本年俄廷籌議以由烏發直接之路行李便捷行軍而外兼利商運先就東西兩端分段  
起築西段由茲拉托城度烏拉嶺至車里雅賓城計長一百五十三俄里以監工官烏沙的司之東段由  
海參崴逆築而西至格喇甫城計長三百八十三俄里以監工官米海洛夫士基司之業已刊播日報其  
全路經費連建棧購車共須四萬一千八百萬盧布擬先籌八千三百萬盧布以資開辦該國不設議院  
度支事秘無由確知此東境鐵路現議開造之情形也查泰西各國建造鐵路幾於歲不絕役俄路在歐



洲者計有二萬數千俄里大致足以聯絡近年來築路喪海以南亦已通及邊要其力稍紓乃謀有事於東彼族喜動厭靜固其常情惟現議烏發一路不假水程軌里最遠成功匪易揣其經營意在逐節前進漸引漸長其間步驟利鈍尤視物力羸絀爲衡曠謂以十年爲期者殆無確準容俟隨時採訪冀得要領所有查訪該國辦理東境鐵路緣由謹繪圖繙說恭摺具陳再俄國一里約當中國二里俄銀每一盧布就近時中國銀價約合庫平銀五錢合併聲明得 旨該衙門知道單隨併噴○依克唐阿奏查興安城原修之衙署基址雖屬高平而地內常行浸水又兼每逢夏雨連綿山水積發之時疊將所蓋之房間不免愈衝刷而愈形彫敝故該處官弁時常附居就近之驛站藉以辦公此亦無可如何之事奴才既經親歷其地洞悉其情自不敢不據實奏陳以期整頓但此後倘將鄂倫春收有成效尙須另探吉地將其衙署籌款移修爲一勞永逸之謀方爲妥切報聞○己未承綬病請解任允之○調治麟爲江甯副都統以積忠爲京口副都統○以直隸天津道胡燏棻捐募浙賑傳旨嘉獎○劉瑞祺奏汾州府屬汾陽平遙介休孝義等縣於三月初九日同時地震汾陽平遙兩縣勘不成災介休縣則倉庫監獄城牆樓堞官民房屋俱有塌裂甚有成澗成溪之處並壓斃五人傷三十餘人孝義縣大致相同壓斃男女八名口傷三十五人疊朱村壓毀社穀二千餘石均經該縣捐給醫藥棺殮酌給貧戶修房資費其倉庫監獄能否就地

籌修再行勘估妥議得 旨知道了卽著飭屬妥爲撫卹毋任失所○許振禱奏桃汛安瀾報聞○裕祿阿克丹奏請興修 大政殿朝房並東西音樂樓允之○張曜奏 臣前派卽用知縣孔昭棠隨 臣河工辦事三月十四日在長清縣楊莊河干風浪大作撞擊埽壩情形危險卽用知縣孔昭棠武舉人馬駿良外委陳寶元及勇夫十三名同時落水隨流淹沒嗣將屍身先後撈獲厚加棺殮 臣查孔昭棠係江蘇進士分發山東以知縣卽用先經派令隨工疊著勞績搶險案內本擬保以同知補用乃成勞未敘遽殞厥身武舉人馬駿良等均係委派在工因公殞命實堪憫惻合無仰懇 天恩勅部將山東卽用知縣孔昭棠武舉人馬駿良外委陳寶元一併從優卹卹以慰忠魂得 旨孔昭棠等均著交部從優議卹○張曜奏因公落水之卽用知縣孔昭棠其祖父孔繼鏐係道光十六年丙申科進士以南河同知於咸豐八年在江南軍營陣亡今孔昭棠又復因公殞命情已可憫茲據孔昭棠同鄉官道員李翼清陳重慶等稟稱已故卽用知縣孔昭棠之妻劉氏因聞孔昭棠在工落水殞命隨即絕食多日復於三月二十一日仰藥自盡實屬深明大義節烈堪嘉開具事實清冊呈懇奏請 旌表前來除將冊結咨部外理合籲請 天恩俯賜勅部旌卹以維風化而慰幽魂得 旨如所請行○裕祿奏奉天自光緒四年開通同江子口岸以來由昌圖鐵嶺等處下達營口水陸暢行商民販載貨糧多以河運爲便每至夏秋兩季行船絡繹不絕

而河路綿長岸多曠野一切緝捕盜賊保護行旅現與旱路情形同關緊要遼河舊祇巡船一隻船身較大只能於下游營口一帶專巡河口內河上游數百里素無巡船河面防緝僅恃附近陸隊在岸兼巡竄  
煽勢難周備現擬就奉省練軍步隊內抽撥弁兵百名仍支原餉專令分駐內河按段梭巡以昭嚴密雖  
餉無增而船須籌備通計遼河上下及省南洋河之內按安設巡兵百名非有船八九隻不敷分布此項  
船隻若購料釘造則爲費較鉅款無可籌奴才詳加酌核查光緒十一年間營口曾置有堵口掛船八隻  
嗣部議飭令變價卽經山海關道以船因堵口而設與商船形勢不同難以出售稟由前任將軍慶裕咨  
部有案迄今停泊數年仍無售主與其日久朽壞前費虛糜莫若改造巡船得濟實用奴才現飭營務處  
逐一查勘詳細估計前項船隻太料均尙堅厚可用照內省長龍舢板礮船之式略爲收小使內河便於  
行駛就料改造可得長龍礮船一隻舢板船四隻舢板四隻以之分巡各河當足敷應用惟此項排船前  
奉部議責令變價現擬留於地方改造巡船自應奏明辦理合無仰懇 天恩准將前項船隻免其變價  
留於奉省改造內河巡船俾資巡緝所需修以工費爲數無多由奴才核實撥給歸於奉省練軍用款內  
彙案報銷於地方大有裨益得 旨如所請行○庚申以上海協賑所紳士二品封職施善昌指分湖北  
知府經元善勸辦浙賑出力傳旨嘉獎○王文韶譚鈞培奏查雲南永北直隸屬屬北勝土州同章天錫

據勢橫行積年擾害逆跡昭彰業將添兵剿辦懲首就殲地方一律安靖改土歸流緣由會摺奏報光緒十六年六月十五日奉 上諭所請將北勝土州同屬境改土歸流一節著該督撫妥議章程奏明辦理等因欽此當卽欽遵飭行司局札委補用同知謝聯慶會同永北直隸同知姜瑞鴻詳細查明稟覆到省經臣批飭司局悉心查辦妥議詳辦去後茲據雲南布政司史念祖會同按察使岑毓英善後局司道詳稱查北勝土州同所轄地方雖屬寬廣其寶山多田少戶口稀零未易添設牧令惟該處與四川會理州鹽源縣接壤民俗强悍實爲極邊最要之區彈壓撫綏均關緊要非安設文武營汛不足以資鎮攝而輯邊氓今據該印委等周歷察看界內之華榮莊最爲適中擬於該處添設經歷一員就其土著土署酌量修葺以爲治所名曰分防永北直隸廳華榮莊經歷仿照普洱府分防通關哨經歷之例作爲夷疆極邊咨調要缺三年俸滿在任候升年支俸廉銀二百兩設門子一名皂隸四名馬夫一名禁卒二名共十二名每名歲支工食六兩共實支銀七十二兩俸銀照例支給此項養廉役食俸薪在於藩庫徵收公件耗羨條丁項下支放入冊報銷仍照章減扣以歸一律並請咨部鑄造永北直隸廳分防華榮莊經歷印信一顆頒發來滇以昭信守所有枷杖以下詞訟准歸該廳審理完結按月造冊具報其命盜等案責令緝捕並設刑件就近驗報如其緝捕不力驗報不實一體查參並擬將原駐舊衙坪之右軍守備移駐該處

所有右軍頭司把總一員原設馬步戰兵一百名迭經裁撤現存戰守兵三十七名爲數無多自應全數留防舊衙坪以資捍衛而免空虛所有移駐華榮莊右軍守備應請酌添戰兵十五名守兵二十名共三十五名連現擬新設挑口一汛與舊衙坪把總均歸右軍守備節制兵丁亦聽其調遣所有月餉照綠營例一律支給挑口係川滇夷巢要道擬請另添把總一員駐紮挑口卽於新添戰守兵三十五名內撥戰守兵一十五名俾資巡緝應建土特衙署營房由善後局在邊餉項下籌款修建以壯觀瞻其舊衙坪華榮莊兩經歷分治地方暨挑口汛專管地面俟定案後勘察形勢劃分地界各專責成應徵錢糧現飭該印委等詳審清理並將一切善後事宜分別擬議另行詳請定案再永北營左右兩軍守備左軍隸六汛右軍隸九汛共十五汛內有金江片角兩汛在本廳之南向隸右軍而遠駐舊衙坪本廳之東北中隔九站一旦有事鞭長莫及該兩汛改隸左軍以便就近節制新添挑口汛卽隸右軍該處甫經綏定新設文武各缺未便久懸應請先委員弁署理以安夷衆除經歷一缺由司揀員詳明委署外一俟奉文覆准再於府經歷本班內揀補一次嗣後卽照例辦理由司先行刊給木質鈴記轉發該文武接收並暫由善後局酌籌薪水以資辦公此外地方應辦事宜容俟該員弁等到任後體察情形隨時稟明辦理等情詳請奏咨前來臣等覆加查核一切章程尙屬周妥應請准如所議辦理下部議奏○辛酉 上奉 慈禧端

脩康頤昭豫莊誠壽恭欽獻皇太后幸頤和園○上還博觴齋○予因公瀕覽之江甯木整局委員補用知州禹金聲議卹○壬戌以楊玉書爲河南歸德鎮總兵○癸亥黃體芳病請解任允之

五月甲子朔 上迎 皇太后還闕西苑○戶部奏呈三庫歲出歲入清冊報聞○予藩爵續假一月○

劉秉璋奏寶川局需用白鉛照機器局鉛價採辦下戶部議奏○己丑 上復詣 大高殿祈雨○以志

顏爲內閣學士○以剛毅奏報遲延罰俸三月○丙寅道溥齡恭詣 景陵致祭○予故布特哈佐領興

福提督程玉庭照軍營立功後積勞病故例議卹○丁卯雨○楊昌溶魏光燾奏伊犁鎮標營制餉章駐

紮處所上年經臣光燾奏明檄飭總兵張俊於到任後熟察情形查照撫臣劉錦棠奏設撫提鎮各標章

程妥籌辦理再行具奏在案茲據伊犁鎮總兵張俊會同署伊犁塔道英林署伊犁府知府潘效蘇分別擬

議呈請核辦等情臣等查伊犁原設漢隊四千人前經奏明分隸軍標一千人以三千人作爲鎮標該處

地屬極邊漢屬散哈錯雜而居彈壓操防均關緊要應照撫提鎮各標因另設標以官帶勇章程就地勢

險夷頗勇多寡妥爲布置務期扼要填紮足資防守用固邊陲查伊犁鎮總兵向駐綏定城爲各城適中

之所擬仍以總兵駐之設鎮標中左右三營中營遊擊一員管帶步隊一旗中軍守備一員馬隊一旗分

防守備一員馬隊一旗分駐城關內外左營遊擊一員管帶步隊一旗駐廣仁城守備一員馬隊一

旗駐果子溝分防守備一員馬隊一旗駐三台右營遊擊一員管帶步隊一旗駐瞻德城中軍守備一員馬隊一旗駐三道河城守營都司一員管帶步隊一旗兼防二工開花礮隊守備一員步隊一哨駐城內計中左右三營城守營開花礮隊馬步各旗哨應設千總把總經制外委三十二員並於中營另設蒙古把總二缺歸鎮署差遣以資緝譯遇有缺出由古城合例人員內補放霍爾果斯營設參將一員駐拱宸城嗣移駐瞻德城相距較遠巡防難周擬仍設霍爾果斯營參將一員管帶步隊一旗駐拱宸城中軍守備一員馬隊一旗駐城外分防守備一員馬隊一旗駐登元卡計該營馬步各旗應設千總把總經制外委十員寧遠城爲伊塔兵備通商道駐紮之地商民萃處交涉事繁擬設寧遠營都司一員管帶步隊一旗駐城內守備一員馬隊一旗駐城外計該營馬步各旗應設千總把總經制外委七員統計該鎮屬參將一員遊擊三員都司二員守備九員千總六員把總二十九員蒙古把總二員經制外委十四員並總兵共官六十七員步隊六旗馬隊八旗開花礮隊一哨除火勇共設正勇三千三十九名歲需餉銀二十萬九千六百八十九兩二錢添設鎮署稿書八名清文書辦二名總文書辦二名蒙古通事二名纏回通事二名哈薩克通事二名各官例馬所備草料查綏定寧遠二縣係屬新設甫經招墾擬暫照巴里坤鎮標各營旗全支折色總共標路各營官兵歲需十成俸薪蔬紅廩費馬乾草料折價及稿書書辦通事口

食等項銀二萬六千七百二兩一錢一分飭據署布政使饒應祺議撥請奏前來理合繕具清單恭呈

御覽仰懇 勅部核議施行下部議奏○戊辰兩○唐炯奏京銅起運日期下戶部知之○庚午兩○予

故河南歸德鎮總兵李承先照軍營立功後積勞病故例議卹○總理各國事務衙門奏臣衙門於四月

初間聞蕪湖教堂被毀當即電致南洋大臣調撥兵輪彈壓保護一面派員馳往查辦又因安慶上海等

處同時均有匿名告白布散謠言並令飭屬加意防範嗣據南洋大臣安徽巡撫電稱蕪湖之事因謠傳

教中女醫迷拐幼孩羣疑莫釋聚眾滋鬧遂將教堂焚毀旋經拿獲首犯二名正法示眾地方業已安靜

乃未幾丹陽復有焚毀教堂之案湖北之武穴地方教堂亦被焚毀並聞殺害洋人二名尙未悉詳細情

形此外若江甯九江亦有匪徒滋事幸經官兵防範登時解散似此紛紛滋擾中外人心不無惶惑推原

其故蓋由沿江各省游勇會匪所在多有其張貼告白無非欲借此搖惑人心乘機生事決非安分良民

之所爲也查泰西之教本是勸人爲善徧行於西國由來已久自各國通商以後條約載明凡在中國或

崇奉或傳習天主耶穌教之人皆全獲保佑身家其會同禮拜誦經等事概聽其便等語其教中施醫育

嬰皆屬善舉近年各省被災地方教士等捐資助賑者頗不乏人其樂善好施亦屬可嘉卽或在教之人

良莠不齊然同係中國子民仍歸地方官管轄遇有詞訟案件教士亦不能干預是民教本可相安乃好



事者往往捏造無根之言轉相傳播致起嫌疑不逞之徒又復藉端滋事意圖搶掠若不早爲嚴防誠恐中外商民皆將不得安居於大局殊有關繫應請 旨飭下各直省將軍督撫出示曉諭居民切勿輕聽謠言妄生事端倘有匿名揭帖造言惑眾卽行嚴密查拿從重治罪各國商民教士地方官必當隨時設法保其身家勿涉大意倘或防範不嚴保護不力致啟弊端卽應據實參處至此次滋事各案除蕪湖案內首犯業經正法外其餘各案應由兩江湖廣江蘇安徽湖北各督撫迅飭查拿首要各犯從嚴懲辦以儆將來至從前各省未結各案該將軍督撫亦應設法從速辦結不得任聽屬員畏難延宕以清積牘

上諭總理各國事務衙門奏各省教案迭出請嚴飭各督撫迅速籌辦一摺據稱本年四月間安徽蕪湖教堂被匪徒焚毀江蘇丹陽縣湖北武穴鎮等處教堂亦相繼被毀亟應查拿首犯早爲嚴防等語各國傳教載在條約曾經降旨飭令各省隨時保護歷年已久中外相安何以近日焚毀教堂各案同時並起殊堪詫異其中顯有巨匪潛謀勾煽布散謠言搖惑衆心希圖乘機搶物甚至妄分良民爲所誘脅助成鉅案若不嚴行懲辦何以嚴法紀而靖地方著兩江湖廣江蘇安徽湖北各督撫迅飭該文武查拿首要各犯訊明正法以儆將來至泰西之教本是勸人爲善卽從教之人亦係中國子民仍歸地方官管轄民教本可相安總因不逞之徒捏造無稽之言藉端滋事此等奸民所在多有著各直省將軍督撫出示

曉諭居民切勿輕聽浮言妄生事端倘有匿名揭帖造言惑眾卽行嚴密查拿從重治罪各國商民教士  
地方官必當隨時設法保護身家勿任奸徒擾害倘或防範不嚴致釀事端卽著據實嚴參其從前各省  
未結各案並著該將軍督撫從速辦結不得任聽屬員畏難延宕以清積牘將此通諭知之○辛未諭李  
鴻章張曜奏會同校閱海軍並查勘各海口臺塢工程事竣一摺覽奏均悉該大臣等周歷旅順等處調  
集南北洋師船會齊合操並將水陸各營以次校閱技藝均尚純熟行陣亦屬整齊各海口礮臺船塢等  
工俱稱堅固李鴻章盡心籌辦頻年布置漸臻周密堪嘉許著交部從優議敘張曜會同籌辦著交部  
議敘各將領訓練士卒修建營塢不無微勞足錄著准其擇尤保獎以示鼓勵海軍關繫緊要必須精益  
求精仍著李鴻章張曜切實講求督飭提鎮各員認真經理以期歷久不懈日起有功另片奏擬在膠州  
煙臺各海口添築礮臺等語著照所議行該衙門知道○壬申 上諭 大高殿報謝○李鴻章奏江浙  
海運漕糧由直隸官制船戶接運至通前於光緒十二年經臣奏定每年船由江浙漕運項內酌貼工食  
銀五兩上年因糧少船多每船祇能輪運一次所得水腳已較歷屆爲少終年停泊苦累難堪此項工食  
若按米數核減必致偷漏滋弊奏明仍按每船五兩發給旋准部咨令自光緒十二年爲始每平斛白石  
准給工食銀七錢五分其從前按年給銀五兩章程卽行停止等因當經轉行遵照茲據天津道胡燏棻

詳稱直隸官船隻向派民戶領駕承運江浙漕糧按年發給工食以資養贍從前每船每年例領工食銀十五兩嗣因蘆綱及東綱生息解不足額將工食減為七兩五錢又須以工食貼補油艚遂至入不敷出窮極滋弊攪和偷盜防不勝防自光緒十二年准以江浙漕項內每年每船貼給工食銀五兩必須運竣以後顆粒並無短少始行照數發給法良意美各船戶不復作奸犯科辦理已著成效應領銀十二兩五錢較之從前十五兩定額尙有減少若將此項工食改按所運米數核發現有原續駁船二千隻以江浙米數均勻核算每船祇能輪運一二次至多不過三次每次運米二百石僅應領一兩五錢運至三次亦不過得銀四兩五錢況以運米之數定工食之多寡不特受兌之始擁擠河干紛紛求運易於滋事設船戶自知不能多運或於末次一運故智復萌再有攪和偷盜等弊雖有峻法在前竊恐仍無實濟請仍照舊給津貼銀五兩以示體恤等情詳請具奏前來臣查直隸駁船二千隻每船酌貼工食銀五兩共領銀一萬兩若按米數核發本年江浙新漕一百二十餘萬石除去截留直隸賑米八萬石計之亦須發銀八千餘兩較原定章程僅少發銀一千數百兩而船戶偷漏之弊難保不乘隙而生所省無多所損實大漕糧爲天庾正供船戶亦朝廷赤子從公苦累情實堪憐現在海運南漕連檣進口剿兌運通勢難久待各船戶窮丁亟盼加惠呼籲頻聞核計照前數年定章每船酌給銀五兩爲數無幾而獲益甚多況江

浙漕糧每年總在一百二十萬石上下上年米少船多山於江浙水災爲數十年來所未有以後斷不常見似不可因噎廢食仰懇 天恩俯准照案仍按五兩給發贍其身家卽所以慎重漕務伏乞 飭部知照得 旨如所請行○明勳奏上年十月間准 綺華館文開現奉 懿旨在西苑內設立 綺華館製造綢緞著派杭州織造購辦搖紡煉染已成上好之各色經絲共五百斤各色緯絲共五百斤招募精通縷絲煉染搖紡接頭織江綢織紡絲綢緞春綢各項匠人各二名招募養蠶婦人八名籌發川資卽飭航海北上並購買各項機張各二分暨隨用器具一併運京各等因前來當經奴才因經緯絲斤應需料工銀兩附片奏請 飭下戶部撥款辦理並將機張匠人等項一時驟難解京情由奏明奉 硃批戶部議奏欽此欽遵在案旋准戶部議覆應需經緯絲斤料工各款行令浙江巡撫轉飭藩司無論何款迅速撥給並機張匠人等項不得以隨時察看情形藉詞延宕等因奴才遵卽咨商籌款一面嚴飭趕緊辦理現已將各色經絲五百斤各色緯絲五百斤敬謹照數辦齊並先行設法製造織江綢織紗織紡絲機張三分隨用運機運車大小各項器具全付並派管工一名招募搖紡接頭織挽各項匠人十名後飭歸安縣招募養蠶婦人五名以及織江綢織紗用各式花本綾索織紡絲用生經緯一應辦齊定於四月十六日起程遴派委員迅速督解航海進京送 綺華館交納理合恭摺具陳下所司知之○乙亥魏光燾奏請

解任回籍終養允之○丙子劉秉璋奏江楚兩省川鹽請停加抽盤金下戶部議奏○丁丑張曜奏臣於  
登州途次接據山東運河道耆安稟稱該道員督挑運河舟泊滕縣西灣地方於三月二十七日戌刻當  
員役人夫歇工散後突有匪徒多人各持鎗械蜂擁上船劈開船鞘劫去挑河銀一千兩及零星衣物等  
件該道員奪護關防致被拒傷臂骨碰落門牙一箇又被開洋鎗礮傷水手一名挑夫一名並棍傷水手  
三名稟請察究等情當經飛咨兗州鎮及嚴札該管道府令縣汛分別嚴緝匪犯並開具職名以憑查  
參去後茲據藩臬兩司轉據揭報前來正核辦間准兗州鎮總兵田恩來函報督率營縣獲犯八名現在  
訊供尚未定案查運河道工次被劫並被拒傷多人該管地方文武員弁實屬疏於防範應卽先行糾  
參以示懲儆相應請 旨將滕縣知縣秦應遠滕縣汛把總袁其智一併摘去頂戴如果所獲匪犯訊係  
正盜真賊另再奏明辦理仍勒緝餘犯務獲不准稍形鬆懈 上諭張曜奏運河道耆安工次被劫獲犯  
訊辦請將疏防員弁摘去頂戴一摺此案匪徒拒傷道員搶劫鞘銀並傷人役多名情節重大非尋常盜  
案可比難保無巨匪潛跡其間亟應迅速拿辦以遏亂萌著張曜督飭地方文武就已獲人犯嚴行訊究  
並將案內首要各犯嚴拿務獲從重懲辦不准一名漏網山東滕縣知縣秦應遠該汛把總袁其智於此  
等重案毫無防範僅予摘去頂戴不足示懲秦應遠袁其智均著先行革職仍勒令協緝該部知道○戊

實大祀 地於 方澤○馬丕瑤奏廣西創辦蠶桑已著成效遵旨先行酌保尤爲出力之官紳得 旨  
覽奏興辦蠶桑尙屬認真著俟通省著有成效核實保獎○李鴻章奏據籌賑局司道詳稱據安徽涇縣  
人朱譜濟以上年順直被災甚重賑需欸奉父命將家產變賣並將親友告貸籌措銀二萬兩解局助  
賑呈請兌收當經該司道以願邀何項獎叙據朱譜濟聲稱親父已革刑部郎中朱鋌請假赴浙省親  
目騎馬進香爲養育兵濟源放爆竹驚馬被馬踏傷濟源身死經浙省巡撫崧駿奏擬杖一百流三千里  
係職官從重發往新疆効力贖罪前曾代父赴部遵例呈繳扣贖銀二千四百兩經戶部咨查刑部以核  
其情罪非常赦所不原自應准其贖罪當荷具奏未蒙 俞允本不敢再生希冀惟念親父體弱多病此  
次遠役遐方跋涉長途艱苦萬狀祖母高年思子日夜憂煎因此致疾沈綿牀褥譜濟目覩情形難安寢  
饋此次竭力報効捐資賑需不敢仰邀獎叙可否據情轉詳奏懇 天恩准予代父贖罪以遂烏私等情  
詳請核奏前來 查已革刑部郎中朱鋌犯罪原案係因騎馬進香被養育兵濟源放爆竹驚馬以致踏  
傷人命本非意料所及核其情節實與過失殺傷人無異今聞擬杖流徙重發往新疆已屬加等辦理與  
實犯遺罪者不同況該革員所犯流罪前經刑部聲擬尙非常赦所不原查同治四年戶部奏定新疆人  
員贖罪一案內稱斬絞緩決各犯遇有 恩旨減爲軍流徙罪並原犯遺軍流徒有曾經具呈請贖經刑

部及各省駁飭不准之案如有自願加一倍或二三倍捐贖者均令摘敘緣事案山收捐督撫具奏請旨等因遵行在案茲查朱譜濟捐助賑銀二萬兩按照例定五品官贖免流罪銀數已加至八倍之多既據聲稱不敢仰邀獎敘情願代父贖罪情辭懇切出於至誠現值工賑喫緊之際得此大批捐款有裨災區非淺與戶部奏准推廣順直賑捐實銀至一萬兩以上者准其專摺奏請成案相符倘該革員罪名果無可追之案臣亦何敢違例越陳惟核其情罪馬驚傷人歷辦成案向照過失殺傷擬徒浙省因係職官從重擬遣既非實犯遺罪可比而刑部核覆謂非常赦所不原現捐鉅款二萬金更與戶部定例凡贖罪駁飭之案如有捐至一二三倍者例得專摺奏乞 恩施亦屬助合伏惟 聖朝以孝治天下凡屬臣子私情一經上達無不仰荷 恩施今朱譜濟痛父速戍慨捐鉅款孝思實堪矜憫可否籲懇 天恩法外施仁准其代父贖罪將革員朱錕免發新疆効力以廣 皇仁而昭觀感出自逾格 懇施得 旨朱錕著不准捐贖原款發還○已卯傅倭卒照軍營立功後積勞病故例賜卹○以明惠為銀白旗蒙古副都統○李瀚章奏留粵補用總兵前署兩廣督標中軍副將唐士貴於光緒十年正月請假省親經前督臣張樹聲批准有案是年五月張樹聲被人參劾前兵部尚書彭玉麟前兩廣督臣張之洞查復摺內誤稱唐士貴頗招物議已經張樹聲驅逐離粵等語核與給假省親之案不符唐士貴係武職大員如果因事

驅逐自應具奏。臣遍查文卷不但並無奏案亦無公牘而其請假離粵確有印案可稽現據該總兵稟稱銷假前來。臣留心察看該員久歷戎行才識穩練訪之衆論愈稱其前在廣東並無劣跡若無故廢棄致令無所申訴殊失。朝廷愛惜將才之意理合據實上陳仰懇。天恩俯念總兵唐士貴並非驅逐離粵飭部更正註冊仍留廣東補用出自。鴻慈。付。旨如所請行。○裕寬奏據署河陝汝道陸襄鉞詳據閩鄉縣紳士前陳留縣訓導張應熬等聯名具呈以閩鄉城垣北瀕黃河縣城歷被衝坍城內居民幾無棲身之所前年經該縣籌辦石壩開工之後原任河陝汝道鐵珊親臨察視駐工督率冰天雪地炎風烈日之中往來無間籌畫布置不遺餘力正因採辦之石難運大塊忽於閩底鎮之南陡發山水湧出大石順流而下得以佐此數百年來未興之巨工見者驚爲神助詎該道鐵珊因操勞太過於上年十月一病不起身後蕭條鄉愚婦孺聞之無不流涕感歎現在大工將屆告成閩邑紳民感德難忘情願就地籌款爲之建祠春秋祭祀並懇詳請奏恤等情呈由該縣申道轉詳前來。奴才伏查閩鄉縣城河患已久數十年皆以工役太大需款太鉅無敢議其事者前河陝汝道鐵珊秉躬端介遇事敢爲因見該縣地勢甚危再不設法保護則全城皆沒於河因建議修築大石壩挑溜護城稟經前撫。臣倪文蔚檄飭確切勘估奏撥鉅款興修自前年冬間開工以後該道隨時馳赴工次督同該縣知縣孫叔謙及各委員等屆集



舟車採運石料撙節款項激勵人夫如何慎防弊竇如何堅固工程莫不口授指畫不厭精詳委員紳士認真効力者面加獎勵怠忽從事者立予撤換該處開山取石遠在數十里外既慮轉運之艱又慮產石無多採取不足乃上年六月初二日夜大雨如注於取石之閘底鎮衝出巨石無數內有最大一石高與屋齊長數丈形如鼉屬中有篆文僅識工石二字論者皆以該道仰體 國家保民之心精誠所至有此神助該紳民等所呈委係實事自是石料始能應手乃該道往來工次經歷寒暑冰雪炎風不避艱苦竟以積勞致疾未及竣工遂至不起聞其身後室無長物貧苦寒素殊覺惻然今工程將屆告竣該處紳民追感不忘捐資爲該道建立專祠記曰有功德於民者則祀之閘鄉之河患長除該道之勩勞可念亦足見該處紳民慕義情殷秉彝篤好查各省辦理工賑等事勞績病故各員一經具奏無不仰邀 恩卹該道既樹功德於民又兼以死勤事合無籲懇 天恩俯准將按察使銜前河陝汝道鐵珊 飭部照因公積勞病故例從優議卹並應否准該縣紳民建祠以順輿情而昭激勵之處出自 鴻慈迴格得 旨如所請行○庚辰麟書等奏內閣鈔出直隸總督李鴻章片奏已革福建試用道傅廣捐助賑銀一萬兩請破格優獎一摺光緒十七年四月初四日奉 硃批傅廣著以道員選用欽此 等查私罪降職人員例有加倍半不准捐復十三條非軍務勞績不准開復如得有軍務勞績保奏後仍令補繳加倍半捐復銀

兩定例極嚴近年捐例頻開自海防餉工及各省賑捐條款所載迭次議增獨私罪降革捐一條未嘗輕議推廣特海軍衙門創立之初籌款不易如道員楊宗濂姚寶勳等皆以捐資奏請錄用嗣各省援案奏請如道員恭鎮朱麟成知府梁俊等亦以捐資復官迨光緒十四年十一月海軍衙門停止報効奏明嗣後獲咎人員報捐概不接收臣部以各省賑捐較之海軍衙門輕重自殊而應一律停止奏請飭下各省嗣後獲咎人員捐復原不准在外兌收爲之援案奏請其有在外交銀者應令戶部核獎給予虛銜封典於十五年正月奏准通行自此以後各省遂無援案捐銀奏請開復之案卽十六年直隸督臣李鴻章奏請推廣順直賑捐被議人員亦僅准捐復銜翎從無捐復原官之議至戶部專摺奏獎新章聲明士民中捐銀萬兩以上由部專摺請獎亦專指士民而言且有外省不得兌收之請本年正月臣部以獲咎人員與士民究有區別奏請飭下戶部嗣後獲咎人員捐輸鉅款務當分別核辦在案是降革捐輸一途本不能照尋常捐輸核辦而於加倍半不准捐復人員限制尤嚴此案已革試用道傅廣捐助賑銀一萬兩據直隸督臣奏請優獎奉硃批以道員選用等查傅廣由粵漢關船房單書報捐道員被人糾參嗣經查明逗遛廣東與庫書往來不知檢束奉旨著卽行革職勒令回籍不准逗遛上年赴部呈請捐復臣部查係革職後勒令回籍之員情節較重在加倍半不准捐復之列照例批駁在案卽使傅廣

有軍功勞績保奏開復亦須補繳加倍半捐復銀二萬餘兩今捐助賑銀一萬兩遂行奏請續懇 恩施不數年卽列首選是捐資之數見少而開復之職加優且該員革職原案又與山東巡撫張曜奏請開復之革職道員陸心源順天府奏請開復降職道員劉麒麟不同惟既經奉 旨錄用自應欽遵辦理但恐各省紛紛援案奏請將獲咎較重之員皆思援踵効尤希圖倖進不惟 部捐復例章皆成虛設卽戶部捐章亦多有礙相應申明例案請 旨飭下各省督撫府尹嗣後遇有獲咎人員捐賑仍按李鴻章奏定推廣捐復銜翎章程奏請獎敘其有報捐鉅款者仍應查照戶部奏案捐款皆歸戶部兌收由戶部分別核辦各直省不得在外兌收爲之援案奏請以杜取巧而示限制如蒙 俞允俟 命下之日應由 部卽通行各直省督撫府尹一體欽遵辦理 上諭吏部奏獲咎人員捐賑請獎申明例案一摺自來予奪之權操之自上近年各省恭逢恩詔及捐輸保獎人員朕核其情節有特旨允准者有交部議奏者其特旨允准之中有照原官起用者有降等給獎者恩施輕重朕心自有權衡豈能以特降編書仍聽部議准駁嗣後凡遇各督撫奏請獎敘之案其交部議奏者該部自應援照例章分別核辦若特旨賞給官職及照所議獎敘者該部卽遵諭行不得援照部章煩請○壬午以登萊青道盛宣懷倡捐勸賑實項品戴○癸未修南苑圍牆○甲申長順奏造齊辦賑各項清冊賑餘存銀作爲伊通等處積穀經費下戶部

知之○乙酉遣麟嘉恭請 景陵致祭○命嵩申督修 重華宮等處工程○丁亥兩○戊子藩醫因病  
奏請開缺允之○命恩銘福森布爲演放水師礮位大臣○己丑諭戶部奏稽察雲南運銅各員期滿請  
旨更換一摺雲南辦解各起頭批京銅現據咨報起程此後續辦銅斤次第起解前派沿途經理各員期  
滿該部查照例案將經過四川湖北江蘇直隸等省藩臬開列名單請旨更換四川藩派德壽湖北藩派  
王之春江蘇藩派鄧華熙直隸藩派裕長卽責成各該員嚴飭各道府及沿途地方文武員弁認真稽查  
催攆護送前進如有無故逗遛及盜賣短少等弊詳報該督撫嚴行參辦沿途應需水師照料之處卽由  
派出之員詳咨前途督撫及水師提督調遣仍著自奉旨之日起以三年爲限均責成此次所派之員一  
體經理遇有升調事故卽令接任之員遵辦期滿再行更換其貴州省辦解京鉛經過各省並著各該員  
妥爲照料以重運務○庚寅以崧蕃爲貴州巡撫○楊昌濬奏階州水災放賑銀數下戶部知之○魏光  
燾奏海洋盜匪燒殺搶劫勢甚兇悍幸回子郡王瑪木特督衆擊斃賊酋始各逃散又復遣派回目拿獲  
首要各犯消除亂萌保全地方實屬異常出力該回子郡王瑪木特應如何給獎以示鼓勵之處出自  
天恩其餘出力回目人等由 臣賞給功牌銀兩以昭激勸得 旨瑪木特助剿出力甚屬可嘉著加恩賞  
穿黃馬褂○辛卯以龔煦爲四川布政使黃毓恩爲浙江按察使○王文韶奏已革通判鄧良臣被參

可原辦鉛有效得 旨鄧良臣著開復原銜交唐炯差遣委用○是月日斯○  
拉國參贊阿嶽樂兼署使事 允亞國使臣調駐委內瑞